

2 Corintios

¹ Høøch Pablo hädaa nocy njahby. Jesucristøch tøø xwyiinguexy cooçh ja'a miädia'agy nyajwá'xät. Ja'a Dios jaduñ mänaamb cooçh nyajwá'xät. Ja'a hermano Timoteo, tu'ugwiinmáhñdyhøch je'e xmiøødhity cooçh hädaa nocy njaay. Mijts hädaa nocy nyajnäguexaamby pønjaty Diosmädia'agymiäbøjp maa ja'a cajpt xiøhatiän Corinto, møød maa ja'a naax xiøhatiän Acaya wiinduhmyhagajpt. ² Ween mijts ja'a Dios hoyhajt weenhajt xmiø'oy møødä Jesucristo. Dios hajxy nDeedyhájtäm. Jesucristo hajxy nWiindsønhájtäm.

³ Tsøgä Dios hajxy tehngajnä wiingudsähgøøyyäm. Tsøc hajxy tehngajnä nämáayyäm Dioscujú'uyäp. Ja'a Jesucristo Tieedy je'e. Jaançh tehñ yhojiot ja'a Dios miøød. Xjiotcapxmøcpøjcäm hajxy homiänaajä, ⁴ hoy ñebiaty hajxy cu nja jajt cu nja habéjtäm. Paady hajxy jaduñ xjiotcapxmøcpøjcäm, jaduñ hajxy hoy njootcapxmøcpøjtägájtäm pønjaty häyohmbaatp. ⁵ Hix, nebiä Jesucristo chaaçhpøjquiän, jaanä jaduñ hajxy ndsaaçhpøjcämbä. Y coo ja'a Jesucristo hajxy nmøødhíjtäm tu'ugmädia'agy, paadiä Dios hajxy xjiaançh tehñ jootcapxmøcpøjcäm. ⁶ Coo højts ndsaaçhpøcy, mänit højts Dios xjiotcapxmøcpøcy. Y jaduñ mijts njootcapxmøcpøjtägajtspä. Y jaduñ mijts Diosmädia'agy nyajwiingapxø'øwät neby hajxy jaduñ mnähwá'adsät. Coo mijts

mdsaačhpøjpät neby hõjts ndsaačhpøquiän, mänit mijts njootcapxmøcpøgät neby hajxy jaduhñ hoy mmee'xtúgät. ⁷ Nnajuøøby hõjts coo mijts mmee'xtuga'añ, coo mijts Dios xjiotcapxmøcpøga'añ, hoy miäduhñtiä mijts cu mja tsaachpøc neby hõjts ndsaačhpøquiän. Nmøød hõjts ja'a tøyhajt jaduhñ.

⁸ Mägu'ughajpädøjc, chojpy hõjts njoot coo hajxy mnajuø'øwät nebiaty hõjts jim ndsaačhpøjcy maa ja'a naax jaduhñ xiøhatiän Asia. Hanaxiä hõjts jim njajty nhabejty. Jaanč tehñ jiootmayhajp hõjts hänajty. Høxtä mänaañ hõjts jaduhñ coo ndijy hõjts hänajty jim nho'oga'añ, ⁹ coo ndijy häna'c hänajty tøø quiojyquiapxytiuñ coo hõjts hänajty xyagho'oga'añ. Paady hõjts jaduhñ njajty nhabejty, jaduhñ hõjts nnajuø'øwät coo jagooyä Dios xñäwá'anät, cab hõjts hamdsoo hoy nniñäwa'anøøjät. Haa ca'a, Dios jaduhñ yagjujypiøjtägajtsp ja'a tøø yhó'oguiäbä. ¹⁰ Xñäwaan hõjts ja'a Dios coo hõjts häna'c hänajty jim xjia yagho'oga'añ. Homiänaajä hõjts jaduhñ xñäwa'ana'añ. Nmøød hõjts ja'a tøyhajt jaduhñ. ¹¹ Naxy mijts ja'a Dios mdehñ pia'yá'axät maa hõjtscøxpän. Jaduhñ hõjts mijts hoy xpiuhbédät. Coö jäya'ayhajxy nämay Dyiospa'yá'axät maa hõjtscøxpän, mänit hõjts ja'a Dios xñäwa'ana'añ, mänitä jäya'ay ja'a Dios hajxy nämay ñäma'awa'añ “Dioscujú'uyäp”, je'eguiøxpä coo hõjts Dios hoyhajt weenhajt xmio'oy.

¹² Jootcujc hõjts nnijiäwø'øyii coo hõjts hoy tøø njäya'ayhaty maa mijtsän hädaa yaabä naaxwiin. Dios hõjts jaduhñ xpiädaac coo hõjts hoy

njäya'ayhádät. Jaaya'ay hõjts xyhijxp coo hõjts hoy njaanč jäya'ayhaty. Xpiuhbejp hõjts jaduhñ neby hõjts hoy njaac jäya'ayhádät. Cab hõjts hamdsoo hoy nhojiäya'ayhádät. ¹³⁻¹⁴ Hix, howyiinjuøøñä mijts tøø nnäjaayø'øy, caj chipjatiä. Caj mijts mänaa tøø nwiinhøøñ. Tøø hõjts nmädia'agy hajxy siémpräm xwyiinjuøøyyä. Choippy hõjts njoot coo hajxy ca'xy mwiinjuø'owät, jaduhñ hajxy mxoondá'agät maa hõjtscøxpän coo ja'a Jesucristo hänäjty quiädaactägatsa'añ. Je'e hajxy nWiindsøñhájtäm. Mänit hõjts nxoonda'agaambä maa mijtscøxpän.

¹⁵ Nmóødhøch tøyhajt jaduhñ coo hõjts nmädia'agy hajxy ca'xy xwyiinjuø'øwaanä, páadyhøch hijty tøø nja wiinmay coo mijts jadähooc nøcxy cu nguhijxy. Jaduhñ hajxy jadähooc cu nxoondáacäm nägøxiä. ¹⁶ Hix, nøcxáambøch hijty jim maa ja'a naax jaduhñ xiøhatiän Macedonia, y jim mijts hijty ndu'uguhixa'añ Corinto. Y cooch hijty nwiimbidaannä Macedonia, mänit mijts hijty jadähooc ndu'uguhixáangombä cooch hijty jim nnøcxa'añ maa ja'a naax jaduhñ xiøhatiän Judea. Jim mijts jaduhñ cu xpiuhbejty. ¹⁷ Pero cabä Dios jaduhñ miänaañ cooch jim cu nminøøyy maa mijtsän. Ca'a yhamdsoojøotøch jim tøø nga'a naxø'øy. Cab jaduhñ yhoyyä coo hajxy mmáná'anät cóogøch tyijy jaduhñ ndu'ugcapxy nmetscapxy, cooch jim tøø nga'a naxø'øy. Ja'a häna'c-hajxy ca'a mäbøjpä, je'eds hajxy tu'ugcapxp metscapxp, ca'a yhøøchä. ¹⁸ Dios hõjts xyhijxp coo hõjts nga'a hønnda'agy. Cab hõjts mijts mänaa tøø nmøødtu'ugcapxy tøø

nmøødmetscapxy. ¹⁹ Hix, ja'a Jesucristo, ja'a Dioshuung, cab je'eduhn mänaa tiu'ugcapxy mietscapxy. Homiänaajä tiømiädia'agy. Y coo højts mijts nyajwiingapxøøyy ja'a Jesucristocøxpä, paady højts nga'a tu'ugcapxy nga'a metscapxy, ni høøch Pablo, ni hermano Silvano, ni hermano Timoteo. ²⁰ Waambatiä Dios jecy miänaañ coo hänajty yajtøjiada'añ, cøjx jaduhn tiøjiaty ja'a Jesucristocøxpä. Y coo højts ja'a mädia'agy nmäbøjcäm ja'a Jesucristocøxpä, jaduhnä Dios møj jaančh nbädáacäm. ²¹ Pero ja'a Dios hajxy xpiuhbéjtäm nebiä Jesucristo hajxy jaduhn nmøødhíjtäm tu'ugmädia'agy tehngajnä, møød højts møød mijts nägøxiä. Jaanä Dios højts jaduhn xwiinguejxpä coo højts ja'a miädia'agy nyajwá'xät. ²² Xyaghijp højts ja'a Dios quiø'øjooty ja'a yhEspirituhaam. Xyhuunghajp højts jaduhn. Xmióoyäm ja'a tøyhajt hajxy jaduhn coo hajxy homiänaajä xcwieendähadáañäm.

²³ Dios ja'a tøyhajt møød cooçh nga'a hønnda'agy. Páadyhøch jim tøø nga'a naxø'øy Corinto maa mijtsän, cábøch njoot hänajty chocy coo mijts nhójt. ²⁴ Pero cab højts mijts nhane'ema'añ nebi-atiä Diosmädia'agy hajxy mmäbøgät. Hix, nna-juøøby højts jaduhn coo hajxy hamuumdu'joot mmäbøcy. Nja wi'i piuhbedaamby højts mijts jaduhn nebiä Diosmädia'agy hajxy maas hoy mbanócxät. Jaduhn hajxy maas jootcuje mhídät.

2

¹ Mänäajøch jim nhuug hoobiän maa mijtsän, mänítøch mijts nhojy je'eguiøxpä coo hajxy hänajty hoy mga'a tuñ. Jootmayhájtäbøch jim nwiimbijty.

Hoorä, tøøch nmädoyhájcombä coo hajxy hoy mga'a túungombä. Tøøch nwiinmahñdyhaty cooçh jim nga'a tsoj nõcxtägatsa'añ maa mijtsän, coo mijts jim nnä'a hojtägátsät. ² Hix, coo mijts nhojtägátsät, mänítøch jadähooc njootmayhada'añ. Pero chójpíøch njoot jaduhñ coo hajxy hoy mdúnät. Jadúhñhøch jootcuyc nhídät. ³⁻⁴ Mänäajøch mijts jayøbajt nhuuc näjaayøøbiän, mänit mijts nmägapxy nhanehmy coo ja'a mhaxøøgcuhdujt hajxy mnajtsnixø'øwät. Jaançh tehñ jiootmayhájpøch hänäjty coo ja'a Diosmädia'agy hajxy hänäjty hoy mga'a panøcxy. Høxtä jóøyyhøch jaduhñ. Paady mijts jaduhñ nmägapxy nhane'emy nocyhaam, njaançh tehñ chojpy mijts jaduhñ. Cábøch njoot chocy coo hajxy mjootmayhadät. Coo ja'a mhaxøøgcuhdujt hajxy mnajtsnixø'øwät nébiøch chamñ nmägapxy nhane'emiän nocyhaam, mänítøch jim jootcuyc nnøcxa'añ maa mijtsän. Coo mijts ja'a Diosmädia'agy hoy cu mbanøcxy, cábøch jaduhñ mänaa cu njootmayhajty. Nnajuóøbiøch jaduhñ coo ja'a Diosmädia'agy hajxy hoy mja wi'i pianøcxa'añ. Y coo hajxy jaduhñ hoy mbanøcxät, jaduhñ hajxy nägøxiä jootcuyc nhíjtämd, møød høøch møød mijts.

⁵ Ja'a mijts mmägu'ughajpä ja'a tøø quiädiéyäbä, nägøxiä hajxy jaduhñ tøø xñägädieeyøøyyäm, ca'a yhøøchähajtiä nidiuhñ. Pero cábøch nmäna'añ coo hanaxiä tøø quiädieey. Hix, cábøch hanaxiä nyajtsähdiuna'añ. ⁶ Hoorä, tøø ja'a mmägu'ughajpähajxy chaachpøcy. Tu'ugwiinmahñdy hajxy mnibiaatä, paadiä

mmägu'ughajpä hajxy myajcumädooyy. Hoorä, tøø jaduñ chaaçhpøjnä. ⁷ Hahixøøby hajxy jaduñ mmämée'xnät. Jaduñ hoy jiootcugøøguiumbät, y cab jaduñ hanaxiä jiootmayhädät. ⁸ Coø hajxy jaduñ mmämée'xnät, myajcøxø'øgaamby hajxy jaduñ coø hajxy mjaanç tehñ chocy. ⁹ Paady mijts jayøbajt nnäjaayøøyy, nhijxmajts mijts jaduñ pø tøyhájtøch nmädia'agy hajxy hänäjty xmiäbögaanä hamuumdu'joot. ¹⁰ Pønjaty mijts mmämée'xyp, jaanä jadúñhøch nmämée'xaambä. Haa ca'a, pø tøøch häna'c nmämée'xy, páadyhøch tøø nmämée'xy, jaduñ mijts jootcuje mhídät. Jesucristøch jaduñ yxhijxp coøch nga'a hønnda'agy. ¹¹ Coø hajxy jaduñ nnimiämée'xämd, cabä møjcu'ugong miäjädá'agät maa højtscøxphájtäm. Nnajuøøyyäm hajxy coø ja'a møjcu'ugong jiaanç tehñ miäwiinhøøñ.

¹² Coøch jim nmejch maa ja'a cajpt jaduñ xiøhatiän Troas Diosmädia'agy-yajwa'xpä ja'a Jesucristocøxpä, nbáathøch hawa'adspä coøch jim ndägø'øwät Diosmädia'agy-yajwa'xpä. ¹³ Pero coøchá hermano Tito jim nga'a paaty maa ja'a hermanodøjc-hajxiän, mänitøch ndägøøyy jootmayhájpä. Mänitøch nwiimbijnä. Mänitøch nnøcxy maa ja'a naax jaduñ xiøhatiän Macedonia.

¹⁴ Dioscujú'uyäp ja'a Dios coø højts xpiuhbety, coø højts xyaghity tu'ugmädia'agy møødá Jesucristo. Jaduñ højts ja'a Dios xpiuhbety coø højts ja'a møjcu'ugong nga'a yajmäjäda'agy majaty højts ja'a Diosmädia'agy nyajwa'xy ja'a Jesucristocøxpä. Homiädoonä ja'a jäya'ayhajxy

miädoy nebiaty hõjts nyajwiingapxø'øy.
 15-16 Xquiumaaby hõjts ja'a Dios coo hõjts ja'a
 miädia'agy nyajwa'xä ja'a Jesucristocøxpä.
 Pønjaty hoy mädoob, pønjaty mæbøjp, je'eds
 nähwa'adsaamb. Jugyhadaamb hajxy je'eduhñ
 cøjxta'axiøø nebiä Dios jiugyhatiän. Pero pønjaty
 hoy ca'a mädoob, pønjaty ca'a mæbøjp, cab hajxy
 jaduññ nähwa'adsa'añ. Je'eds hajxy haxøøgtuum
 nõcxy miähmø'øwa'añ. Caj pøn yhamdsoo jada'añ
 Diosmädia'agy-yajwa'x. 17 Hõjts mæbøcypiä njajpy
 je'eguiøxpä coo hõjts ja'a Dios xwyiinguejxy.
 Hamuumdu'joot hõjts nduñ je'eguiøxpä coo hõjts
 ja'a Jesucristo tu'ugmädia'agy nmøødhity. Xyhijxp
 hõjts ja'a Dios jaduññ coo hõjts hoy nduñ. Jii häna'c
 näje'e, cab hajxy hoy tiuñ. Ja'a Diosmädia'agy tyijy
 hajxy yajwa'xyp. Pero yhamdsoo mädia'agy hajxy
 wyl'i miädiaacy, je'eguiøxpä coo hajxy jia wyl'i
 quiänaarhada'añ. Hõjts, cab hõjts jaduññ nbahixy.

3

1 Cab hajxy mmäná'anät coo tyijy hõjts nnigu-
 iumayii nebiä häna'c ñiguiumayijän, ja'a yhamd-
 soo mädia'agy hajxy miäwädiippiä. Coo hajxy
 hänajty maa ñøcxa'añ, mänitä hermanodøjc hajxy
 ñäma'ay coo nocy hajxy jaduññ ween yhädiuunäxä
 cooc tyijy ja'a Diosmädia'agy hajxy hoy tøø ya-
 jwa'xy. Pero hõjts, cab hõjts jaduññbä nocy nya-
 jmaajiaty, ni coo mijts nyaghíxät, ni coo mijts
 xmió'owät. 2 Hoy piønä ñajuø'øy coo hõjts ja'a
 Diosmädia'agy hoy nyajwa'xy. Haa ca'a, tøø ja'a
 Diosmädia'agy hajxy mmæbøcy mänaa hõjts jim
 hoy nyajnähixø'øyän. Hix, njaanç tehñ cho-
 jpy hõjts mijts hamuumdu'joot. Homiänaajä hõjts

mijts njahmiejtsta'agy. ³ Coo ja'a Diosmädia'agy hajxy tøø mmäböcy, jaduñä cu'ug ja'a tøyhajt hajxy miøødä coo højts ja'a Jesucristo jaduñ xwyiinguejxy maa mijtscøxpän, coo højts mijts ja'a Diosmädia'agy nyajwiingapxø'øwät. Jujcy ja'a Dios. YhEspírituhaam ja'a Dios hajxy xyajmäböjcy. Jaduñ miäbaady coo ja'a Jesucristo tøø yuugjaay maa ja'a jäya'ay quiorazoncøxpahxjän. Cab jaduñ tøø yuugjaay tsaagøxp tintahaam nebiä Dios jecy yuugjahyyän tsaagøxp maa ja'a tun xiøhatiän Sinaí.

⁴ Paady højts jaduñ nmäna'añ, nmøød højts ja'a tøyhajt coo højts ja'a Jesucristo xwyiinguejxy. ⁵ Pero cab højts tii njada'añ hamdsoo. Dios højts jaduñ xpiuhbejp coo højts njädät. ⁶ Jaaya'ay højts jaduñ tøø xyajnähdiy coo højts ja'a hawiinjemybiä mädia'agy nyajwá'xät ja'a Jesucristocøxpä. Hädaa hawiinjemybiä mädia'agy, yhEspírituhaam højts ja'a Dios tøø xmio'oy. Cabä Dios tøø jiahñä tsaagøxp nebiä jecyquihdujt jecy jiahyyän tsaagøxp. Yø'ø jecyquihdujt, cab jaduñ pøn hoy quiudiuna'añ, paady hijty pøn quia'a pädsøma'añ haxøøgtuum. Pero coo ja'a hawiinjemymädia'agy hajxy mmäbögät, mänitä Dios hajxy xyagjugyhädät cøjxta'axiøø yhEspírituhaam neby je'e jiugyhatiän.

⁷ Hoorä, coo ja'a Dios ja'a jecyquihdujt jiahy tsaagøxp, høxtä haamb høxtä tsämaamb ja'a Moisés ja'a wyiin jiøjp hänajty, høxtä cabä israelita ja'a Moisés ja'a wyiin jiøjp hajxy hänajty hoy yheebaanä. Pero paquiä ja'a Moisés ja'a wyiin jiøjp jaduñ ñä'ä haañ ñä'ä tsämamy. Paadiä Moisés ja'a wyiin jiøjp hänajty yhañ chämamy,

tøø ja'a Moisés hānajt̃ yhoj jim̃ Dioswiinduum maa ja'a Dios hānajt̃ tøø quiāda'aguiān jim̃ tungøxp̃. Y møcmājaa ja'a Dios jiaanč̃ teh̃m̃ miøød̃. Hoorā, yø'ø jecyquihdujt̃, cab jaduh̃ñ pø̃ñ hoy quiudiuna'añ, paady hijty pø̃ñ quia'a pädsøma'añ haxøøgtuum. ⁸⁻⁹ Hoorā, coo ja'a Dios ja'a Moisés ja'a wyiin jioj̃p̃ jecy yaghaanā yajtsāmaamā, jaduh̃nā Dios yajcāhxø'cy coo møcmājaa miøødā. Y coo ja'a Dios ja'a hawiinjemyiādia'agy tøø yejnā coo hajxy tøø xpiādāacām hawa'adstuum, ja'a yhEspirituhaam ja'a Dios ja'a hawiinjemyiādia'agy tøø yecy. Jaduh̃nā Dios maas hoy tøø yajcāhxø'ogy coo møcmājaa miøødā. Hix̃, hoy-yagjuøøñā ja'a Moisés ja'a wyiin jioj̃p̃ jecy yhaañ chāmaamy. Maas hanaxiā ja'a hawiinjemyiādia'agy yhoj-yagjuøøñā, ja'a højts nyajwa'xypā. ¹⁰⁻¹¹ Jaduh̃ñ quiāhxø'ogy coo ja'a jecyquihdujt̃ jaduh̃ñ quia'a jat̃y tsoobaatnā. Ja'a hawiinjemyiādia'agy ja'a Jesucristocøxpā, je'eds jaduh̃ñ tsoobāatnāp̃. Y cab jaduh̃ñ mānaa tiāgoyya'añ.

¹² Tøyhajt̃ jaduh̃ñ, paady højts nga'a tsähdiuñ mānaa højts ja'a Diosmädia'agy nyajwa'xiān, ni nga'a mädsähdiuñii højts jaduh̃ñ. ¹³ Hix̃, haamb̃ tsāmaambā Moisés ja'a wyiin jioj̃p̃ hānajt̃ coo ja'a Dios ja'a Moisés ja'a miādia'agy miooyy. Mänitā Moisés ja'a cu'ug ja'a Diosmädia'agy yajwiingapxøøyy. Coo ja'a Moisés miādiaacpādøøyy, mänitā wit̃ ñiyajwiinguwidsøøyyā, je'eguiøxpā coo ja'a wyiin jioj̃p̃ hānajt̃ jejcy quia'a hanaannā quia'a tsāmamaannā. Paady jaduh̃ñ miädsähdiuunā. Hix̃, yhixaambiä israelita ja'a Moisés hajxy hānajt̃ coo ja'a Moisés ja'a wyiin jioj̃p̃

hänajty quia'a haanä quia'a tsämaamnä. ¹⁴⁻¹⁶ Pero ja'a israelitahajxy, jaanč tehṃ quiuhxex hajxy hänajty, cab hajxy hänajty miädia'agywyiinjuø'øy. Høxtä chamnäbaadyñä hajxy jaduhṃ quiuhxexä. Coo ja'a jecyquiuhdujt hajxy mänaa miädoy, cab hajxy jaduhṃ wyiinjuø'øy, ja'a Moisés jecy miädiäacäbä. Mänit hajxy jaduhṃ wyiinjuø'øwät coo hajxy hänajty tøø miäbøcy hamuumdu'joot ja'a Jesucristocøxpä. Je'e hajxy nWiindsønähätäm. ¹⁷ Hoorä, tu'ugjuøhñdy ja'a Jesucristo yhity møødä Tieediä yhEspiritu. Y coo hajxy nmäbøjcäm ja'a Jesucristocøxpä, jaduhnä cuhdujt hajxy xmiöoyäm coo Dios hajxy nba'yáaxämd. ¹⁸ Hoorä, pønjaty jaduhṃ hamuumdu'joot mäbøjp ja'a Jesucristocøxpä, tøø hajxy ngøxy wiinjuøøyyäm coo ja'a Jesucristo miøjjä jiaančhä. Tehngajnä ja'a Jesucristo hajxy xyaghaguiptyjatiøøyyäm neby je'e yhitiän. Hix, tu'ugjuøhñdy je'e yhity møødä Tieediä yhEspiritu.

4

¹ Hojioot ja'a Dios jiaanč tehṃ miøød, paady højts tøø xwyiinguexy coo højts ja'a miädia'agy nyajwá'xät ja'a Jesucristocøxpä. Paady højts nga'a jootmayhaty ni mänaa. ² Nyejpy højts ja'a tøyhajt coo højts ja'a Diosmädia'agy nyajwa'xy. Cab højts jaduhṃ mänaa nhøhnda'agy. Ñajuøøbiä cu'ughajxy jaduhṃ coo højts mänaa nga'a nhøhnda'agy. Xyhixp højts ja'a Dios jaduhṃ. Ja'a häna'c-hajxy hønndaacpä, cabä Diosmädia'agy hajxy ca'xy yajwa'xy. Yhamdsoo mädia'agy hajxy jaduhṃ yajmämädiaagøøby magämaa. Höchähdiuunnä hajxy jaduhṃ jiatcø'øy. Pero

højts, ja'a tøyhajt højts nmädiaacyy. ³ Cabä jäya'ay ja'a mädia'agy hajxy nägøxiä wyiinjuø'øy, ja'a højts jaduhñ nyajwa'xypä ja'a Jesucristocøxpä. Paady hajxy jaduhñ quia'a wiinjuø'øy coo hajxy haxøøgtuum wiädity. ⁴ Paadiä Diosmädia'agy hajxy quia'a mæbøga'añ, tøø ja'a wyiinmahñdyhajxy piädäacäxä haxøøgtuum ja'a møjcu'ugóngäm, ja'a yaa hanehmbä hädaa yaabä naaxwiin. Coo ja'a wyiinmahñdyhajxy tøø piädäacäxä haxøøgtuum, paadiä Diosmädia'agy hajxy hoy quia'a wiinjuø'øwa'añ maa jaduhñ myiñän cujaay coo ja'a Jesucristo møcmäjaa miøødä. Tu'ugmädia'agy ja'a Jesucristo yhity møødä Tieedy. ⁵ Coo højts ja'a Diosmädia'agy nyajwa'xy, ja'a Jesucristo højts nmädiaacyy coo hajxy nägøxiä nWiindsønhtëm. Cab højts jaduhñ nyajcumaya'añ. Jaduhñ højts njoot chocy coo højts mijts nbuhbédät, je'eguiøxpä coo højts ja'a Jesucristo nWiindsønhaty. ⁶ Dios jecy mänaan coo jøøn jiájät hagoonstuum. Cahnä ja'a naaxwiimbä hänajty yhoyø'øy. Jaaya'ay højts ja'a miädia'agy jaduhñ tøø xyajwiinjuø'øy coo je'e møcmäjaa miøødä. Coo ja'a Jesucristo hajxy tøø xyajnhwaats tøø xyajcuhwáatsäm, jaduhñ hajxy nyajnajuøøyyäm coo ja'a Dios møcmäjaa miøødä.

⁷ Jaaya'ay højts tøø xwyiinguexy coo højts ja'a miädia'agy nyajwá'xät ja'a Jesucristocøxpä. Jaanç tehñ choobaatp ja'a miädia'agy jaduhñ. Højts, cab højts møcmäjaa nhamdsoo møødä. Dios højts jaduhñ xpiuhbejp coo højts ja'a miädia'agy nyajwá'xät. Coo højts jaduhñ xpiuhbety, jaduhñ yajnajuø'øy coo ja'a Dios møcmäjaa jiaanç

tehm̄ miøødä. ⁸ Tøø højts häyohn may nmäna_xy nyajna_xy, pero cab jadu_hn tiehm̄ yhanaxiä. Naxy højts nga'a najuø'øy neby højts njatcø'øwät, pero cab højts hanaxiä njootmayhaty. ⁹ Tøø højts häna'c mayhooc xjia wi'i chaaçhtiuna'añ, pero cab højts ja'a Dios mänaa xñajtshixø'øy. Hoy højts häna'c mayhooc tøø xjia häyoowhixy, cab højts nmøjpäda'agy. Hix, homiänaajä højts ja'a Dios jadu_hn xcwieendähaty. ¹⁰⁻¹¹ Nebiä Jesucristo hijty mäjahñdium wiäditiän jabom-jabom, jaanä jadu_hn højts mäjahñdium nwädi_jpä homiänaajä. Ja'a Jesucristocøxpä højts häna'c xjia wi'i yagho'oga'añ. Pero cab højts Jesucristo xñä'ägä nähducy. Hix, coo ja'a Jesucristo yho'cy, mänit jiu_jy_piøjtägajch. Mänit jim̄ ñøcxy maa ja'a Tieediä wyiinduumän. Jimä møcmäjaa jäda'ahaty miøødänä. Paady højts jadu_hn homiänaajä xcwieendähaty. ¹² Paady højts mäjahñdium nwädity coo højts Diosmädia'agy nyajwa'xy. Coo ja'a Jesucristo jiu_jy_pahaty, paady hajxy xcwieendähajtäm homiänaajä.

¹³ Jadu_hn jim̄ myiñ cujaay maa ja'a Diosmädia'aguiän coo tu'jäya'ay jecy miänaañ: “Nmäbø_jpiøch ja'a Diosmädia'agy, päadyhöch ja'a Dios ngapxpaady”; jaanä jadu_hn højts ja'a Diosmädia'agy nmäbøjpä, paady højts ja'a Dios ngapxpaatpä. ¹⁴ Coo ja'a Dios ja'a Jesucristo yagju_jy_piøjtägajch, ja'a nWiindsøn_hajtäm, jadu_hn højts ja'a tøyhajt nmøødä coo højts xyagju_jy_piøjtägatsaambä näguipxy møød mijts. Paadiä Dios hajxy xyagju_jy_piøjtägatsaanäm coo hajxy nhajtäm tu'ugmädia'agy møødä Jesucristo.

Mänitä Dios hajxy nägøxiä xyajnøcxáanäm jim maa ja'a wyiinduumän näguipxy møød mijts. ¹⁵ Paady højts häyohn nmänaxy nyajnaxy, chojpy højts njoot jaduñ coo mijts ja'a Diosmädia'agy hamuumdu'joot mmäbøgät cooc ja'a Jesucristo hajxy tøø xñähho'túutäm. Jaaná jaduñ højts njoot chojpä coo ja'a jäya'ayhajxy maas nämay jiaac mäbøgät, weenä Dios hajxy nämay ñäma'ay: "Dioscujú'uyäp", je'eguiøxpä coo ja'a Dios hojiot jiaanç tehñ miøødä. Y weenä Dios hajxy nämay ñämaabiä coo møcmäjaa jiaanç tehñ miøødä.

¹⁶ Nnajuøøby højts jaduñ coo ja'a Dios hajxy xyagjuypioğáanäm, paady højts nga'a jootmay-haty. Tehngajnä højts ja'a Dios møcmäjaa xjiaac mo'oy maa højts njuøhñdycøxpän, hoy højts nni'x ngopc tehngajnä jia mäjay. ¹⁷ Neby højts häyohn yaa nmänaxy nyajnaxiän, cab højts jejcy nmänax nyaj-naxa'añ. Y cab højts jaduñ njaty tsaächpøcy. Coo højts jaduñ tøø njaty tøø nhabety, paadiä Dios ja'a mayhajt møj may tiuna'añ maa højtscøxpän cøjxta'axiøø.

¹⁸ Pero cab højts jaduñ nmøjpäda'agy coo højts jaduñ yaa njaty nhabety hädaa yaabä naaxwiin. Hix, paquiä højts nnä'ä jaty nnä'ä habety. Jim højts njoot nbäda'agy maa ja'a Dios ja'a wyiinduumän. Cøjxta'axiøø hajxy jim xyaghidáanäm.

5

¹ Tsipcøxp hajxy nho'ogáanäm ndägoyyáanäm. Pero nmøødhájtäm ja'a tøyhajt hajxy jaduñ coo ja'a Dios hajxy tøø xyajnähdíjjäm cooc hajxy jim xyaghidáanäm maa ja'a wyiinduumän cøjxta'axiøø. Diósäts hajxy jim xyaghidáanäm, ca'a

wyiingjäya'ayä hajxy jim xyaghidáanäm. ² Coö hajxy yaa ndsaačhpójcäm hädaa yaabä naaxwiin, paadiä njoot hajxy jaduhñ tøø nbädáacäm coö hajxy jim nnøcxáanäm tsajpootyp. ³ Coö hajxy jim ngóo'tämđ, jaančh tehñ jiootcuyc hajxy jim nnijäwø'øwáanäm jim Dioswiinduum. ⁴ Mäduhñtiä hajxy yaa njaac híjtäm hädaa yaabä naaxwiin, cab hajxy jootcuyc nhíjtäm je'eguiøxpä coö hajxy yaa ndsaačhpójcäm. Pero cab hajxy ndsójcäm coö hajxy paquiä nho'c ndägóoyyämđ. Je'e hajxy ndsójcäm coö njugyhájtämđ cøjxta'axiøø nebiä Dios jjugyhatiän. ⁵ Ja'a Diósäts hajxy jaduhñ xyajnáhdíjjäm coö hajxy jim xyajnøcxáanäm maa ja'a wyiinduumän. Tøø ja'a yhEspíritu hajxy jaduhñ xyajnäguéjxäm coö hajxy jaduhñ xmiøødhíjtämđ tu'ugmucy. Jaduhñä tøyhajt hajxy nmøødhíjtäm coö ja'a Dios hajxy tøyhajt xjiaančh yagjugyhadáanäm cøjxta'axiøø neby je'e jjugyhatiän.

⁶ Paady højts jootcuyc nhity jabom-jabom. Mäduhñtiä højts yaa njaac jugyhaty hädaa yaabä naaxwiin, cab højts jim ndsoj nøcxa'añ maa ja'a Jesucristo wyiinduumän. Tøyhajt jaduhñ. ⁷ Hoy højts ja'a Jesucristo yaa nga'a ja hixy hajujcy, nmäbøjcäp højts ja'a miädia'agy jaduhñ. ⁸ Cab højts nnä'ägä jootmayhaty ni weeñtiä. Choippy højts ja'a njoot coö højts nhó'ogät, coö højts jim nnøcxät maa ja'a Jesucristo wyiinduumän. ⁹ Cab højts nmøjpäda'agy pø ho'ogaamb højts, ó pø cab højts ndsoj ho'oga'añ. Pero choippy højts njoot jaduhñ coö højts ja'a Jesucristo miädia'agy hoy ngudiúunät. Jaduhñ højts ja'a Jesucristo

xquiumáyät. ¹⁰ Hix, nägøxiä ja'a Jesucristo hajxy nõcxy nwiindäna'awáañäm. Mänit jaaya'ay ñägäpaxa'añ pøn hänajty hoy tøø quiudiuñ, pøn hänajty hoy tøø quia'a cudiuñ. Pønjaty hänajty hoy tøø quiudiuñ, je'eds ja'a hoyhajt ja'a weenhajt hajxy paadaamb. Pero pønjaty hänajty hoy tøø quia'a cudiuñ, quiumädowaamb by hajxy je'e.

¹¹ Nwiingudsähgøøby højts ja'a Jesucristo. Jia wi'i chojpy højts ja'a njoot jaduhñ coo højts xquiumáyät. Nja wi'i yajmábøgaamb by højts ja'a cu'ughajxy coo højts ja'a Jesucristo tøyhajt tøø xwyiinguexy. Ñajuøøbiä Dios coo højts ja'a miädia'agy hamuumdu'joot ngudiuunä. Chójpíöchä njoot jaduhñ coo mijts mnajuøøbiät coo højts ja'a Diosmädia'agy hamuumdu'joot ngudiuñ. ¹² Cab højts nyajcumaya'añ, hoy højts jaduhñ nja niñänømyii coo højts ja'a Jesucristo tøø xwyiinguexy. Paady højts mijts jaduhñ nhawáañäm, jaduhñ mijts mnajuø'owät neby højts mijts xpiuhgapxø'owät coo højts häna'c hänajty jaduhñ tøø xñähwaambety. Ja'a häna'c-hajxy jaduhmbä, je'e hajxy yajcopcøøby pø hoy yhamdsoo cuhdujt hajxy quiudiuñ. Cab hajxy ñä'ägädä wiinjuø'øy coo ja'a wyiinmahñdyhajxy quia'a nä'ägädä hoyyä. ¹³ Jaduhñ højts häna'c xñänømy cooc tyijy højts nguhmäñø'øy coo højts ja'a Dios ndsocy. Diósäts højts xñajuøøby coo højts nga'a cuhhiñ coo højts nga'a cuhmäñø'øy. Hix, chojpy højts ja'a njoot jaduhñ coo mijts ja'a Dios ja'a hoyhajt ja'a weenhajt xmiø'owät. ¹⁴ Coo højts ja'a Jesucristo xjiaanç tehñ chójcäm, paady højts ja'a miädia'agy

ngudiúunäm hamuumdu'joot. Nmøødhájtäm ja'a tøyhajt hajxy jaduhñ coo jaaya'ay hajxy hoy xñähho'túutäm nägøxiä. Xyajnähwáatsäm ja'a nbojpä ngädieeyhajtämhajxy. ¹⁵ Coo ja'a Jesucristo hajxy hoy xñähho'túutäm, paadiä nhamdsoo cuhdujt hajxy nga'a yajtúunänä. Tsögä miädia'agy hajxy jaduhñ cudiúunäm mäduhñtiä hajxy yaa njaac jugyhájtäm. Y coo ja'a Jesucristo jiuypiojtägajch, jaduhñä tøyhajt hajxy nmøødhájtäm coo hajxy xyagjugyhadáanäm cøjxta'axiøø nebiä Tieedy jiuigyhatiän. ¹⁶ Cab højts pøñ nyajcopcøøñä pø mäyøøhajxy, pø häyoobhajxy. Ja'a Jesucristo, jaduhñ højts hijty nhixy nebiä pajäya'ayän. Pero cab højts jaduhñ nhixnä nebiä pajäya'ayän. ¹⁷ Hoorä, pønjaty ja'a Jesucristo tu'ugjoot tu'ugjuøhñdy møødhíjnäp, hawiinjembíä wiinmahñdy hajxy jaduhñ miøødhájnäp. Tøø ja'a yhaxøøgwiinmahñdy hajxy jaduhñ yhøxhixnä.

¹⁸⁻¹⁹ Ja'a Dios jaduhñ mänaañ coo hawiinjembíä wiinmahñdy hajxy nmøødhájtämd. Y coo ja'a Jesucristo hajxy hoy xñähho'túutäm, jaduhñä Dios ja'a nbojpä ngädieey hajxy xyajnähwáatsäm. Jaduhñ hajxy xmiøødnijiootpáatäm. Y højts jaduhñ tøø xwyiinguexy coo højts ja'a miädia'agy jaduhñ nyajwá'xät coo ja'a Jesucristo hajxy tøø xñähho'túutäm, y coo ja'a Dios hajxy xyajnähwáatsäm, y coo ja'a Dios hajxy jaduhñ xmiøødnijiootpaadáanäm. ²⁰ Ja'a Dios højts tøø xwyiinguexy coo højts ja'a Jesucristo miädia'agy nyajwá'xät. Jaduhñ højts tøø xñäma'ay coo højts mijts nmänuu'xtá'agät coo miädia'agy hajxy mmäbójcät. Jaduhñä Dios hajxy xyajnähwá'adsät.

Jaduhñ hajxy ween xmiøðnjiootpaadóøjät. ²¹ Cabä Jesucristo ja'a Dios mänaa miägädiehy. Pero coo Dios hajxy xjiaančh tehñ chójcäm, paady miänaañ coo ja'a Jesucristo ja'a nbojpä ngädieeyhajxy xchømó'cämd. Y coo ja'a Jesucristo hajxy xñähho'túutäm, jaduhñä Dios hajxy xyajñähwáatsäm. Jaduhñ hajxy xpiädáacäm hawa'adstuum.

6

¹ Tøø ja'a Diosmädia'agy hajxy mmäbøcy, paadiä Dios ja'a hoyhajt ja'a weenhajt hajxy tøø xmiø'oy. Højts mijts nmänuu'xtaacyy coo ja'a Diosmädia'agy hajxy hoy mgudiúnät. Paady mijts jaduhñ nmänuu'xta'agy, coo højts ja'a Dios nmøødtuñ. ² Hix, jaduhñ jim myiñ cujaay maa ja'a Diosmädia'aguiän:

Tøøch nyajñähdiy mänájøch miich ja'a hoyhajt ja'a weenhajt hawiinmats nmó'owät.

Cooch miich mänit xpia'yá'axät, mänitøch miich nmädówät. Mänit nbuhbédät. Mänit nya-jñähwa'ads nyajcuhwá'adsät,

nømä Diosmädia'agy miäna'añ. Hoorä, tøø yhabaatnä coo ja'a Dios hajxy nba'yáaxämd. Jaduhñä Dios hajxy xyajñähwaats xya-jcuhwáatsämd.

³ Maa højts ja'a Diostuung nduñän, hoy højts njäya'ayhaty. Hix, cab højts ndsocy coo højts pøn xñähwaambédät. ⁴ Hoy højts ja'a Diostuung njaančh tuñ. Nmee'xtujpy højts hoy tyijä, hoy ñejpiä højts nja jaty nja habety. Hanaxiä højts tøø ndsaächpøcy. Tøø højts häyohn mayhooc nmänaxy nyajnaxy. ⁵ Tøø højts

mayhooc nyajwobho'ogy. Tøø højts mayhooc nyajtsumy. Tøø højts ja'a cu'ug mayhooc xñäbädø'ogy. Tøø højts mayhooc nhanuu'xø'oy ja'a Diosmädia'agyquiøxpä. Tøø højts jamia'ay nhity mayhooc ja'a Diosmädia'agyquiøxpä. Tøø højts mayhooc jaguiay jayhu'ugy nhijpä. ⁶ Coo højts ja'a Diostuung nduñ, cab højts haxøøgwiinmahñdy nnä'ägä møødä. Nwiinjuøøby højts ja'a Diosmädia'agy. Mee'xxieemy højts nhity, cab højts tii nmøjpdä'agy. Hojioot højts nmøød. Hix, ja'a Dioshespíritu højts nmøød. Hamuumdu'joot højts jäya'ay jaduhñ ndsocy nba'häyoy. ⁷ Nyajwa'xyp højts ja'a tøyhajt. Ja'a Diosmäjaa højts nmøød. Jaanč tehñ yhoy højts njäya'ayhaty nebiä Dios choquiän. Jaduhñ højts ja'a haxøøgpä nga'a yajmäjäda'agy. ⁸ Näje'eyyä højts jäya'ay jaduhñ xwyiingudsähgø'oy. Näje'e højts xquia'a tsoy xquia'a mee'xy. Näje'e højts xquiumay, näje'e højts xñähojy. Tømiädiaacp højts, hoy højts jäya'ay näje'e xjia nänømy cooc tyijy højts nhøhñda'agy. ⁹ Hoy højts ja'a tsaangu'ug xjia hixyhaty, cab højts häna'c näje'e xmiämøj xmiämayø'oy. Mäjahñdiuum højts njaanč tehñ wiädity, høxtä xyagho'ogaamb højts jäya'ay. Pero ja'a Dios højts jaduhñ xcwieendhajp. Tøø højts ja'a Dios xyajcumädoy, pero cabä Dios jaduhñ miäna'añ coo højts nhø'ogät. ¹⁰ Jootcuyc højts nnä'ägä hity homiänaajä, hoy højts wiingumänaajaty nja mänaxy nja yajnaxy. Hoy højts nja häyoy, nyajnähixøøby højts ja'a jäya'ay ja'a Diosmädia'agy nämay, jaduhñä hoyhajt ja'a weenhajt hajxy piädät. Hoy højts

tii nga'a ja mөөдä, Dios højts xmiоoby tijaty højts nyajmaajiajpy.

¹¹ Mägu'ughajpädöjc, ja'a mijts jim hijpä Corintos, mijts jaduһn nmägapxyp. Tөө mijts ngөxy hawáanäm nebiaty højts ja'a mädia'agy nmөөдä. Njaančh tehм chojpy højts mijts jaduһn. ¹² Nja wi'i miөөdnijiootpaadaanäp højts mijts. Cab højts nnajuө'өy pө jaduһn mijts xjiäwөөbiä. ¹³ Tunä mayhajt hajxy, tsөc hajxy nijiootpaatäm. Jaduһn mijts nmägapxy nebiä huungän.

¹⁴ Cab hajxy mmөөdwädijmügät pөn ja'a Diosmädia'agy ca'a mäbөjp, coo hajxy jaduһn mnä'a pahjxpät neby hajxy yhaxөөгwäditiän. Hix, pөnjaty ja'a Diosmädia'agy mäbөjp, hoy hajxy quiudiuñ. Hawa'adstuum hajxy je'e. Pero pөnjaty ca'a mäbөjp, cab hajxy quiudiuñ. Wiing ja'a wyiinmahñdyhajxy. Haxөөгtuum hajxy je'ebä. ¹⁵ Hix, cabä Jesucristo tu'ugmädia'agy yhity mөөдä möjcu'ugong. Jaanä jäduһnduhmbä, pөn ja'a Diosmädia'agy mäbөjp, cab hajxy tu'ugmädia'agy yhipä mөөд ja'a Diosmädia'agy hajxy ca'a mäbөjpä. ¹⁶ Cabä cuhdujt jaduһn myiñ coo häna'c quepychech naaxpoch hajxy wyiingudsähgө'өwät maa ja'a Diostөjcän. Cabä quepychech naaxpoch jiujyquiä. Ja'a Diösäts mäbөcy jujcy. Y coo ja'a Diosmädia'agy hajxy nmäbөjcäm, jaduһn mäwiin hajxy nmäbaatäm nebiä Diostөjcän, je'eguiөxpä coo ja'a Dioshөpöritu hajxy nmөөdhajtäm. Jaduһnä Dios jecy miänaañ:

Pөnjätyhöchä	nmädia'agy	xmiөbөjcäp,
je'echä	nhEspöritu	nmo'owaamby.
Nwoowhidäambiөch hajxy je'e.		

Xwyiingudsähgø'øwáambøch hajxy je'e.

Ngu'ughadáambiøch hajxy je'e,
nømä Dios hajxy jecy xmiädiáacäm. ¹⁷ Jaduhñä
Dios jecy miánaambä:

Puhwaatsnä hajxy ja'a häna'c ja'a quepychech
hajxy wiingudsähgøøbiä, ja'a häna'c ja'a
naaxpoch hajxy wiingudsähgøøbiä.

Cab hajxy mmøødwädiymúnät. Høxhix
ja'a haxøøgpä hajxy. Mänitøch mijts
xquiø'ødägøøñät.

¹⁸ XTieedyhadáambøch mijts hánajtiän.
Nnøøxhadáambiøch nmajc-hadáambiøch
mijts hánajtiän,

nømä Dios jecy miánaañ. Møccuhdujt ja'a Dios
miøød. Hoy piønä jaduhñ yhane'emy.

7

¹ Mägu'ughajpädøjc, tøyhajt jaduhñ coo
ja'a Dios hajxy xyhuunghájtäm. Tsøcxä
haxøøgwiinmahñdy hajxy najtshixøøyyäm cøxiä.
Yø'ø haxøøgwiinmahñdy, xyajmá'táp ja'a mni'x
ja'a mjuøhñdy jaduhñ. Tsøgå Dios hajxy
wiingudsähgøøyyäm. Tsøgå njoot hajxy pädáacäm
maa ja'a Dioscøxpän.

² Cham højts mijts nnämäaguumbä, tunä
mayhajt hajxy, tsøc hajxy nijiootpáatäm. Cab
højts pøn tøø nhäyoowhixy, cab højts pøn
haxøøgwiinmahñdy tøø nyajnáhixø'øy, cab højts
pøn tøø nwiinhøøñ. ³ Pero cábøch nmána'añ
cooch pøn tøø xñähøøno'øy. Njaanç tehñ chojpy
højts mijts jaduhñ mäduhñtiä hajxy yaa njaac
jugyhájtäm hädaa yaabä naaxwiin. Jaduhñ mijts
hijty tøø nhuuc nämaabiä. ⁴ Nnajuøøbiøch coo

mijts ca'xy mgudiuna'añ waambátyhøch mijts tøø nmägapxy tøø nhane'emy. Ngumáabiøch mijts jaduhñ. Jootcújc-høch njaančh tehñ ñijiäwø'øyii maa mijtsçøxpän. Jaančh tehñ xioondáacpøch, hoy højts madiu'u nja tsaächpøcy.

⁵ Coø højts ja'a hermano Tito jim nga'a paaty maa ja'a cajpt jaduhñ xiøhatiän Troas, paady højts jim nwiimbijty. Y coø højts yaa nmejch Macedonia-naaxooty, ni yaa højts ja'a hermano Tito nga'a paatpä. Coø højts yaa nga'a tsoj paaty, paady højts hijty jootcujc nga'a nä'ägädä ñijiäwø'øyii. Xmiädsiphajp højts jäya'ayhajxy hijty ja'a Diosmädia'agyquiøxpä. Jootmayhajp højts hijty je'eguiøxpä cooc tyijy mijts jaduhñ mga'a mäbøga'añ. ⁶ Ja'a Dios, yagjootmøcpøjpy je'e pønjaty jaduhñ jootmayhajp. Y coø ja'a hermano Tito jiaančh mejch, mänit højts ja'a Dios xyagjootmøcpøjcy. ⁷ Xjiaančh tehñ yagjootmøcpøjc højts ja'a Dios jaduhñ coø højts ja'a hermano Tito xyhawaanä coø mijts je'e myagjootmøcpøjcy mänaa jim yhitiän maa mijtsän. Cøjx højts xyhawaanä cóogøch mijts xjia wi'i jiøbhixy coøch jim nnøcxät maa mijtsän. Jaduhñ højts tøø xyhawaanäbä cooc mijts mjootmayhaty je'eguiøxpä coøch mijts hijty tøø xyhuuc yagjootmayhajpä. Y jaduhñ højts tøø xyhawaanäbä cóogøch mijts xjiaančh tehñ jiahmiejtsta'agy. Coø højts jaduhñ tøø xquiøxy hawaanä, páadyhøch njaančh tehñ xioonda'agy.

⁸ Mänájøch mijts ja'a nocy jawyiinhajtpä nyajnäguexiän, nhójjøch mijts jaduhñ siémpräm. Paady hajxy weeñtiä mjootmayhajty.

Jootmayháthøch høøch wéeñtiäbä coo mijts nhojy. ⁹ Coo mijts nhojy, paadiä mhaxøøgcuhdujt hajxy mhøxhijxy. Xquiumaayy mijts ja'a Dios jaduñ coo hajxy jaduñ mhøxhijxy. Coo hajxy jaduñ mhøxhijxy, páadyhøch nxoonda'agy, ca'a jie'eguiøxpä coo hajxy mjootmayhajty. ¹⁰ Pønjaty yhaxøøgcuhdujt høxhijxp, je'edshajxy hodium mähmó'owäp. Cumay hajxy jaduñ piädsómät maa ja'a Diosän. Y cab hajxy jaduñ jootmayháñät. Pero pønjaty yhaxøøgcuhdujt ca'a høxhijxp, haxøøgtuum hajxy miähmó'owät. Hoy miänaaxøø hajxy jaduñ jootmayhada'añ. ¹¹ Pero mijts, hamuumdu'joot hajxy mgudiuñ nebiaty mijts tøø nmägäpxy tøø nhane'emiän mänáajøch ja'a jayøbajtpä nocy nguexiän. Mjaanç høxhijx ja'a mhaxøøgcuhdujt hajxy nebiä Diosmädia'agy yhane'emiän. Mjootmayhajt hajxy jaduñ coo hajxy hijty tøø mgädieey. Y mdsähgøøyy hajxy jaduñ weeñtiä. Chojpy ja'a mjoothajxy coo mijts ngumáyät, paadiä craa hajxy mhøxquejxpädsøømy, ja'a haxøøgjatcøøyyäbä. Tøø hajxy myajcähxø'nø coo hajxy tii pojpä tii cädieey mga'a møødän. ¹² Paady højts ja'a nocy jim nguejxy maa mijtsän, coo häna'c-hajxy haxøøg tøø ñidiuñii. Ca'a jie'eguiøxpajtiä højts yø'ø nocy nguejxy. Paady højts nguejxpä, chojpy højts ja'a njoot hänäjty coo hajxy myajcähxø'øgät coo højts mijts xchocyñä. Xyhijxp højts ja'a Dios jaduñ coo højts nga'a høhnda'agy. ¹³ Coo højts mijts jaduñ xchocyñä, paady højts nxoonda'agy.

¹⁴ Xoondaacp højts jaduñmäbä coo ja'a hermano Tito xioonndaacpä. Paady xioonnda'agy coo ja'a

Diosmädia'agy hajxy hānajty hoy mbanøcxyñä nāgøxiä mänaa jim yhiñän maa mijtsän. Tøøchä hermano Tito hijty nnāma'ay coo mijts ja'a Diosmädia'agy hoy mgudiuñ. Y tøyhajt hajxy mjaančh cudiuñ. ¹⁵ Hamuumdu'joot mijts ja'a hermano Tito xjiaančh tehñ chocy, je'eguiøxpä coo mijts ja'a miädia'agy mmäbøjcä hamuumdu'joot nebiaty mijts xyhanehmiän. ¹⁶ Nnajuøøbiøch coo mijts ja'a Diosmädia'agy hoy mbanøcxaanñä; päadyhøch nxoonäda'agy.

8

¹ Hoorä, mägu'ughajpädøjc, cham højts mijts nyajmøødmädia'aga'añ nebiaty ja'a Dios mayhajt tøø tiuñ ja'a mäbøjpädøjcøxpähajxy, ja'a hajxy jim tsānaabiä Macedonia-naaxooty. ² Jaančh tehñ xioonädaacp hajxy, hoy hajxy jaduñ tøø jia tsaachpøcy hoyhoy, hoy hajxy jaduñ jia häyoy hanaxiä. Coø hajxy jaduñ jiaančh tehñ xioonäda'agy, paadiä xädø'øñ hajxy may tøø yajmucy. Hojiot hajxy jiaančh tehñ miøød, paady hajxy may tøø yajmucy. Tøø ja'a häyoobäjäya'ay xädø'øñ hajxy mio'oyii; ja'a hermanodøjc-hajxy jaduñ tøø yecy. ³ Hamuumdu'joot hajxy jaduñ tøø yecy, ca'a yhadsipä, ca'a yhajootma'adä. Tøøch nhamdsoo hixy coo hojiot hajxy jaduñ jiaančh tehñ miøødä. Høxtä yejnajxypä xiädø'øñ hajxy jaduñ näjootpä. ⁴ Coø hajxy miädoyhajty coo højts ja'a häyoobäjäya'ay hānajty nbuhbeda'añ xädø'øñhaam, ja'a Diosmädia'agy hajxy mäbøjpä, mänit højts xñāmaayy coogä xädø'øñ hajxy jaduñ quixaambä, ja'a hajxy jim tsānaabiä

Macedonia. Hamuumdu'jóotäc hajxy jaduhñ quiexa'añ. ⁵ Xoon̄daac højts jaduhñ coo ja'a hermanodøjc xädø'øñ hajxy may yejcy, ja'a hajxy jim̄ tsänaabiä Macedonia. Y coo hajxy miänaañ coo ja'a Dios ja'a miädia'agy hajxy hamuumdu'joot quiudiunaanä, paady højts maas hanaxiä nxoondaacy. Dios jaduhñ mänaañ coo hajxy jaduhñ quiudiúnät. Jaduhñ hajxy miänaambä cooc højts ja'a nmädia'agy hajxy xquiudiunáañäbä. ⁶ Mänaa ja'a hermano Tito jim̄ jayøbajt yhooyän maa mijtsän, mänit hajxy xñämaayy coo xädø'øñ hajxy myajmúgät. Hoorä, jim̄ højts ja'a hermano Tito nguejxtägatsaambä maa mijtsän, weenä xädø'øñ hajxy mgøxy yajmucy. Mänit hajxy jim̄ mguéxät maa ja'a häyoobäjäya'ayhajxiän, ja'a Diosmädia'agy hajxy mäbøjpä. ⁷ Jaanç tehñ yhoy ja'a Diosmädia'agy hajxy mmäbøcy. Jaanç tehñ yhoy hajxy myajwiingapxø'øy. Jaanç tehñ yhoy hajxy mwiinjuø'øy. Hamuumdu'joot hajxy jaduhñ mmäbøcy. Xjiaanç tehñ chojpy højts mijts. Hoorä, chojpy højts ja'a njoot coo mijts ja'a häyoobäjäya'ay mjaanç tehñ piuhbédät hamuumdu'joot xädø'øñhaam.

⁸ Cábøch mijts ndehñ yhane'emy coo hajxy mbuhbédät. Paady mijts jaduhñ nyajmøødmädia'agy nebiatiä wiingjäya'ayhajxy tøø miäbuhbetiän, ween hajxy jaduhñ mbahjxpät. Jaduhñ hajxy myajcähxø'øgät coo hajxy tøyhajt mjaanç mädsøjpä. ⁹ Tøyhajt jaduhñ coo ja'a Jesucristo hojioot jiaanç tehñ miøødä, ja'a nWiindsønhajtämhajxy. Cahnä hänäjty yaa quiäda'agyñä hädaa yaabä naaxwiin nebiä

pajäya'ayän, jim hijty mœc yhane'emy maa ja'a Tieedy ja'a wyiinduumän. Pero coo yaa quiädaacy, mänit jaduñ jiajty nebiä hädaa yaabä jäya'ayhajxiän, neby hajxy yaa nhäyóowäm. Jaduñ hajxy hoy xñähho'túutäm. Y coo hajxy jaduñ tøø xñähho'túutäm, paady hajxy jim xyajnœcxáanäm maa ja'a Tieediä wyiinduumän, pønjatiä miädia'agy jaduñ mäbójcäp.

10-12 Cham mijts nwiingapx njøjcapxø'øwa'añ coo ja'a xädø'øñ hajxy myajpedøød neby hajxy hadojumøjt mwiinmahñdyhajtjän coo hajxy hänäjty myajmuga'añ. Mja nähmajts hajxy jaduñ, pero cahnä hajxy myajpedyii. Hahixøøby jaduñ coo hajxy myajpedøød, jaduñ hajxy myajcähxø'øgät coo hojiot hajxy tøyhajt mjaançh møødä. Mijts jaduñ mwiinmahñdyhajtsohñ coo xädø'øñ hajxy hänäjty myajmuga'añ. Jaduñ hajxy myégät neby hajxy mmäjäda'aga'añ. Mädøyyä jaduñ. Cab jaduñ yhahixø'øy coo hajxy hanaxiä myégät. Hix, jaduñä Dios ja'a jioot chocy coo hajxy myajcähxø'øgät coo hojiot hajxy jaduñ mjaançh møødä.

13 Cábøch nmäna'añ coo hajxy mhäyoodägø'øwät, páadyhøch tøø nmäna'añ coo hajxy hanaxiä mga'a yégät. 14 Jadúñhøchä njoot chocy coo pøn tii quia'a yajmaajiädät. Jaduñds je'e, hahixøøby jaduñ coo mijts ja'a häyoobäjäya'ay mbuhbédät, je'eguiøxpä coo mijts nä'ä tägø'øbä mmøødä jäda'ahaty. Y coo mijts hänäjty tøø mhäyoodägø'øy, mänit mijts xpiuhbejtägätsät, pø jim hajxy hänäjty miøødä nä'ä tägø'øbä. 15 Jaduñ jim myiñ cujaay maa ja'a Diosmädia'aguiän: "Pønjaty may yajpädø'c, piuhmooyy hajxy je'e pønjaty weeñtiä

yajpädø'c. Yaghaguipxyjatiøøyy hajxy jaduhñ tu'cuhdujt.”

¹⁶ Dios ja'a hermano Tito jaduhñ tøø yajnähdijy coo hojioot miøødhádät maa mijtscøxpä, neby højts hojioot nmøødän maa mijtscøxpän. Dioscujú'uyäp ja'a Dios jaduhñ. ¹⁷ Coø højts ja'a hermano Tito nnämaayy coo jim ñócxät maa mijtsän, jootcugøøyy je'e coo højts jaduhñ nnämaayy coo jim ñócxät. Hix, hamdsoojoot hijty jaduhñ ñä'ägä nøcxa'añ.

¹⁸ Nyajmäguexø'øwaamby højts ja'a hermano Tito ja'a mägu'ughajpä wiingpä. Wiinduhmçhajtøjc tøø yajmädoxyhaty coo ja'a Diosmädia'agy hoy yajwa'xy ja'a Jesucristocøxpä.

¹⁹ Jaduhñä mäbøjpädøjc-hajxy tøø miänaambä coo højts nmødhádät majaty højts ja'a xädø'øñ nyajmucy mänaa højts ja'a häyoobäjäya'ayhajxy hånajty nøcxy nmo'owa'añän. Cähxø'øgaamb jaduhñ coo ja'a Dios miøjjä jiaançhä. Jaduhñ quiähxø'øgaambä coo højts hojioot nmøødä.

²⁰ Paady højts nämetsc nädägøøg nwädity xädø'øñyajmujpä, cab højts ndsocy coo højts pøn xñänómät cooc tyijy højts nje'ehada'añ. Hix, majiaty højts xädø'øñ nyajmucy. ²¹ Chøjpy højts ja'a njoot jaduhñ coo højts ja'a jäya'ayhajxy xquiumáyät neby højts ja'a Dios xquiumáyän.

²² Chaads højts ja'a mägu'ughajpä mäwiingpä nguexáangumbä møødä hermano Titohajxy. Mayhooc højts hoy tøø xmiøødtuñ hoy ñä'ä mädyii tuungä. Hamuumdu'joot jim ñøcxa'añ maa mijtsän. Hix, ñajuøøby jaduhñ coo mijts hoy myajtøjtägø'øwa'añ. ²³ Naxiä hermano Tito hajxy hoy mdehm yajtøjtägø'øwät coo hajxy jim miédsät.

Haa ja'a hermano Tito, hoy miänáajøch jaduhñ xñä'ägä møødtuñ, páadyhøch jim̄ nguexa'añ maa mijtsän. Y ja'a jiamiøødhajxy nämetspä, ja'a mäbøjpädøjc-hajxy yaabä, jaduhñ hajxy tøø miänaambä coo hajxy jim̄ ñócxät. Hoyyä Jesucristo hajxy wyiingudsähgø'øy. ²⁴ Coo mijts ja'a hermano Tito hoy myajtøjtägø'øwät møødä jiamiøødhajxy, jaduhñ mijts ja'a mäbøjpädøjc hajxy xyhíxät coo hajxy tøyhajt mjaançh mädsocy. Tøjiádäp jaduhñ neby højts mijts tøø nmädia'aguiän coo mijts hojoot mjaançh tehñ miøødä.

9

¹ Høøch mijts jaduhñ nnä'a jaac näjaayøøby. Nnajuøøbiøch jaduhñ coo mijts ja'a häyoobäjäya'ayhajxy mbuhbeda'añ, ja'a Diosmädia'agy hajxy mäbøjpä. ² Hix, nnajuøøbiøch coo hajxy hamuumdu'joot mbuhbeda'añ. Jadúhñhøchä mäbøjpädøjc-hajxy tøø nhawaanä, ja'a hajxy jim̄ tsänaabiä Macedonia-naaxooty. Jadúhñhøch hajxy tøø nhawaanä coo mijts hadojumøjt mdägøøyy xädø'øñyajmujpä, pønjiätä Diosmädia'agy jim̄ mäbøjp Acaya-naaxooty. Y coo mijts jayøjp mnähmajch, paadiä Macedóniabä jäya'ayhajxy nämay xpiahixaambä. Jaduhñ hajxy hamuumdu'joot miäbuhbedaambä nej mijts mmäbuhbeda'añän hamuumdu'joot. ³ Páadyhøchä hermano Titohajxy jim̄ nguejxø'øga'añ maa mijtsän, weenä xädø'øñ hajxy paquiä myajmujpädø'øy. Jaduhñds je'e, cooçh jim̄ nnócxät, tøø ja'a xädø'øñ hajxy hånajty mgøxy yajmujnä. Haa ca'a, tøøchä Macedoniabähajxy nhawaanä coo mijts ja'a xädø'øñ myajmuga'añä.

⁴ Hix, wéhn̄dōchā Macedóniabā jāya'ayhajxy naje'e nmødhádät jim̄ maa mijtsän. Y coo hajxy jaduh̄n xyhíxät coo ja'a xädø'øñ hajxy hānajty mga'a cøxy yajmucyñā, mdsähdiunaamb hajxy jaduh̄n. Jadúh̄nhøch ndsähdiúumbät je'eguiøxpä cooch mijts tøø nmädia'agy coo ja'a xädø'øñ hajxy hānajty myajmuga'añ. ⁵ Páadyhøch jaduh̄n nwiinmaayy coo hijty yhahixø'øy coochā hermano Titohajxy jawyiin nguejxø'øgät maa mijtsän, jaduh̄n mijts jim̄ xpiuhbédät maa ja'a xädø'øñ hajxy myajmuquiän. Jaduh̄nä xädø'øñ hajxy myaghídät nähix̄ hahixø'ø cooch jim̄ nmédsät, neby hajxy jaduh̄n tøø mmāna'añän coo hajxy myaghida'añ. Jaduh̄n hajxy myajcähxø'øgät coo ja'a xädø'øñ hajxy myega'añ hojiootcøxpä. Cab pøn̄ jaduh̄n miáná'anät cooc tyijy mijts hadsip tøø nhane'emy coo hajxy myégät.

⁶ Jaduh̄nds je'e, pøn̄jaty jaduh̄n wiinduc wiind-saaçh, cabā hoyhajt hajxy piaada'añ. Pero pøn̄jatiä häyoobājāya'ay nāxuu'tsp, je'edsä hoyhajt hajxy jaduh̄n paadaamb. Tøyhajt jaduh̄n. ⁷ Jootcujc hajxy myégät hamuumdu'joot neby hajxy hānajty myega'añän, ca'a yhadsipä ca'a yhajootma'adä, ca'a hajxy tii mnajtshäyowø'øy. Hix, je'e ja'a Dios chojpy pøn̄jaty jaduh̄n jootcujc yejp. ⁸ Møj jaanchä Dios. Xmió'owäp mijts ja'a hoyhajt ja'a weenhajt mõj may, jaduh̄n hajxy tii mga'a yajmaajiádät ni mānaa. Nā'ä tægø'øbä hajxy jaduh̄n xmió'owät, jaduh̄nä wiingjāya'ay hajxy hoy mbuhbejtägátsät hoy ñejpiä. ⁹ Jaduh̄n jim̄ myiñ̄ cujaay maa ja'a Diosmädia'aguiän:

Pøn̄ hojiāya'ay, mõj mayyä häyoobājāya'ay piuh-

bety.

Hoy miänaaxøø ja'a Dios jaduhñ piuhbejtägatsa'añ.
¹⁰ Ja'a Dios, yejpy je'e ja'a tøømd mädyii mní'ibäp, mädyii mdúnäp. Yajmayøøby jaduhñ nebiä mgáyät nebiä mhú'ugät. Jaanä jäduhñduhmbä, xmió'owäp mijts ja'a Dios nä'ä tægø'øbä tijaty hajxy hñajty myajmaajiajpy, jaduhñ mijts ja'a häyoobäjäya'ay mmoodiägätsät. ¹¹ Y coo mijts ja'a häyoobäjäya'ay jaduhñ hamuumdu'joot mbuhbédät, mänit mijts ja'a Dios ja'a hoyhajt ja'a weenhajt mõj may xmió'owät. Y coo højts ja'a häyoobäjäya'ay xädø'øñ nøcxy nmo'oy, ja'a mijts hñajty tøø myéquiäbä, mänitä häyoobäjäya'ay ja'a Dios hajxy ñäma'awa'añ: “Dioscujú'uyäp.” ¹² Hix, coo mijts ja'a häyoobäjäya'ay jaduhñ mbuhbédät, mejtstu'u ja'a hoybä hajxy jaduhñ mduna'añ. Piaadaambiä häyoobäjäya'ayhajxy tijaty hajxy hñajty yajmaajiajpy, y tehngajnä ja'a Dios hajxy jaduhñ ñäma'awa'añ: “Dioscujú'uyäp.” ¹³ Coo mijts ja'a häyoobäjäya'ay jaduhñ mbuhbédät jootcuyc hoy miädyii cajptä, myajcähxø'øgaamby hajxy jaduhñ coo ja'a Dios ja'a miädia'agy hajxy mgudiuunä ja'a Jesucristocøxpä. Jaduhñä häyoobäjäya'ay ja'a Dios hajxy mõj jaančh ñäma'awa'añ, je'eguiøxpä coo mijts ja'a Dios ja'a miädia'agy mgudiuunä, møød coo hojiot hajxy mjaančh tehñ miøødä ja'a häyoobäjäya'aguiøxpähajxy. ¹⁴ Coo mijts ja'a Dios ja'a hoyhajt ja'a weenhajt mõj may tøø xmió'oy, paady mijts ja'a häyoobäjäya'ay xchoga'añ xpia'häyowa'añ, møødä Dios hajxy pia'ya'axa'añ ja'a mijtscøxpä. ¹⁵ Tsøcxä ja'a Dios hajxy nägøxiä nämáayyäm: “Dioscujú'uyäp”,

je'eguiøxpä coo ja'a yHuung yaa quiejxy hädaa yaabä naaxwiin, coo hajxy hoy xñähho'túutäm. Møjmayhajt ja'a Dios jaduñ tiuun hoy-yagjuøøñä.

10

¹ Høøch mijts cham nmägapxaamby nhane'emaamby, høøch Pablohajpä. Mänaa ja'a Jesucristo yaa wiäditiän hädaa yaabä naaxwiin, jaanç tehñ miøødä hojiot hänajty. Mee'xxieemy hänajty jiaanç tehñ wiädity. Jadúhñhøch je'e nja pahixaañ cooç mijts jaduñ nmägapxa'añ nhane'ema'añ. Ja'a nmädsiphøchhajxy, jadúhñhøch hajxy xñänømy cooc tyijy mijts hänajty tsähgø'ø tsähgø'ø nmägapxy nhane'emy mänáajøch jim nhitiän maa mijtsän, pero cooc tyijy høøch nga'a tsähgøøñä coo mijts nmägapxy nhane'emy nocyhaam. Cab jaduñ tiøyyä, nä'ä høhñdaacp hajxy jaduñ. ² Mägu'ughajpædøjc, huuc tunä mayhajt hajxy, høxhix ja'a haxøøgpä ja'a ca'a hoybä hajxy. Coo hajxy jaduñ mhøxhixät, cab mijts jim waamb nnämá'awät cooç jim nnøcxät maa mijtsän. Pero pøn jaduñ mänaamb cooc tyijy højts hoy nga'a wädity nebiä hädaa jäya'ayhajxy hoy quia'a wäditiän hädaa yaabä naaxwiin, je'eç mæbøcy hajxy nhøjäp hajäya'ayhaam. Nyajcähxø'øgæbøch jaduñ cooç hänajty tøyhajt nga'a tsähgø'øy. ³⁻⁴ Hoy højts yaa nja tsäna'ay hädaa yaabä naaxwiin, cab højts ja'a nhamdsoo wiinmahñdy nyajtuñ nebiä yaabä jäya'ayhajxy yajtuñän. Ja'a Dios højts xpiuhbejp ja'a miäjaahaam, cab højts ja'a Dios ja'a miädsip jaduñ nyajmäjädaacä. ⁵ Jii jäya'ayhajxy näje'e wiädity, yajcumayaamb hajxy, høhñdaacp hajxy.

Cabä jioothajxy yajmädsocy coo wiinghäna'c ja'a Dios hajxy pia'häyówät. Nyajcähxø'py højts jaduñ coo yø'ø häna'c-hajxy jaduñ yhøhnda'agy. Y coo højts hänajty tøø nga'a yajmäjäda'agy, mänit højts nyajmäbøga'añ ja'a Jesucristocøxpä, coo ja'a miädia'agy hajxy ween quiudiuñä. ⁶ Y coo mijts hänajty hoy tøø mgudiuñ, cab højts mijts hänajty waamb nnäma'awaannä. Pero pønjaty jaduñ ca'a nä'ägädä cudiunaamb, je'eds højts hahoy nhøxquexaamby maa ja'a tsajtøjcän.

⁷ Pønjaty jaduñ najuøøby coo hajxy tøø wyi-inguexyii ja'a Jesucristäm, ween hajxy ñajuøøbiä cooçh ja'a Jesucristo tøø xwyiinguejxpä. Tøyhajt jaduñ. Hoy piønä jaduñ ñajuø'øy. ⁸ Ja'a Jesucristo højts ja'a cuhdujt jaduñ tøø xmio'oy coo højts mijts nmägäpχ nhané'emät. Chojpiä jioot jaduñ coo mijts ja'a miädia'agy mjaac mäbøjcät. Cabä jioot chocy coo hajxy mdu'udägóyyät. Tøyhajt jaduñ cooçhä Jesucristo ja'a cuhdujt jaduhmbä tøø xmio'oy. Cooçh jaduñ nniñänømyii, cábøch ndsähdiuna'añ, hóyhøch häna'c jaduñ xjia nänømy cóogøch tyijy nyajcumaya'añ hanaxiä. ⁹ Cábøch mijts nhadsähgø'øwa'añ, hoy mijts nocy naxy nja yajnäguexy. ¹⁰ Ja'a nmädsiphøchhajxy, jaduñ hajxy miäna'añ cooc tyijy mijts møc nhane'emy nocyhaam. Pero jaduñ hajxy miänaambä cooc tyijy hänajty møc nga'a hane'emy mänägøch jim nhitiän maa mijtsän, cooc tyijy hänajty weenjaty ndsähgø'øy. ¹¹ Pero pønjaty jaduñ mänaamb, cabä tøyhajt hajxy miøødä. Jaduhndsä tøyhajtpä, neby højts mijts møc nhane'emiän nocyhaam, jaanä jaduñ mijts møc nhane'emaambä coo højts jim

nnøcxtägátsät maa mijtsän.

¹² Jii häna'c-hajxy näje'e, jaančh tehṃ yajcumayaamb hajxy cooc tyijy hajxy jiaančh tehṃ jiaty jiaančh tehṃ ñajuø'øy. Hamiñ haxøpy hajxy jaduhñ ñiguiumayii. Y cabä wiinghäna'c hajxy quiumay. Pero cabä tøyhajt hajxy miøøä. Højts, cab højts jaduhñ nhäna'c-haty. Cab højts jaduhñ niguiumayii. ¹³ Caj pues, cab højts nyajcumaya'añ. Jaduhñ højts nduna'añ neby højts ja'a Dios tøø xyajnähdijjään coo højts ndúnät. Jaduhñ højts tøø xyajnähdijy coo højts jim ndúnät høxtä jimbaady maa mijtsän. ¹⁴ Coo højts jim nduñ maa mijtsän, ngudiumby højts jaduhñ neby højts ja'a Dios tøø xñäma'ayän. Hix, højts ja'a Diosmädia'agy jim nyajwa'xtsohn maa mijtsän, ja'a Jesucristocøxpä. ¹⁵ Majaty wiinghäna'c jaduhñ tøø tiuundsooñän, cab højts jaduhñ nmäna'añ coo højts jim tøø nduñ. Cab højts jaduhñ nguhdujthaty. Pero chojpy højts ja'a njoot coo mijts ja'a Diosmädia'agy maas hoy mmäbøgät, jaduhñ højts maas hoy njaac tehṃ tiúnät maa mijtsän. ¹⁶ Y jaduhñ højts ja'a Diosmädia'agy hoy nyajwá'xät jäguembaady maa pøn ja'a Diosmädia'agy quia'a mädoynän. Hix, cab højts nduna'añ maa wiinghäna'c jaduhñ tøø tiuundsooñän. Hix, cab højts jaduhñ nyajcumaya'añ.

¹⁷ Jaduhñ jim myiñ cujaay maa ja'a Diosmädia'aguiän: “Cab jaduhñ yhahixø'øy coo hamdsoo mniguiumayøøjät. Pero jaduhñ yhahixø'øy coo ja'a Dios hajxy møj jaančh mnänómät.” ¹⁸ Je'eduhñ tsoobaatp coo ja'a Dios

jaduhñ xquiumáyät. Cab jaduñ choobaady coo hamdsoo mniguiumayóøjät.

11

¹ Huuc tunä mayhajt hajxy, huuc mee'x hajxy weeñtiä. Chámhøch weeñtiä nhuuc mädia'aga'añ nebiä jäya'ayhajxy yajcumayaambän. Cooch jaduñ weeñtiä nniguiumayii, jaduñ yajmädooy nebiä cuhhiimbähajxy miädia'aguiän. ² Nej mijts ja'a Dios xchoquiän, jadúhnhøch mijts ndsojpä, je'eguiøxpä cooch mijts ja'a Diosmädia'agy tøø nyajmäbøcy ja'a Jesucristocøxpä. Chóppiøchä njoot jaduñ coo ja'a mjoot hajxy mbädá'agät hamuumdu'joot maa ja'a Jesucristocøxpän. Cabä mjoot hajxy wiingtuum mbädá'agät. ³ Mnigwieendähadóøjöp hajxy, jaduñ hajxy pøn xquia'a jøjcaxø'øwät, coo hajxy xyagjahdiägóyyät ja'a Jesucristo. Jii häna'c-hajxy näje'e wiädity mäwiinhømbä. Cab mijts xyajmädsocy coo ja'a Jesucristo hajxy hamuumdu'joot mbanøcxnät. Paquiä hajxy jaduñ xwyiinhøønät. Haa ca'a, jaduñä Eva jecy yhuuc wiinhøhnäbä ja'a mõjcu'ugóngäm mänaa ja'a mõjcu'ugong ñibiäda'agyijän nebiä tsahñdiän. Siémprämä mõjcu'ugong quiuwiinmahñdiä. Paquiä ja'a Eva yajwiinhøhñ. ⁴ Paquiä mijts ja'a miädia'agyhajxy jaduñ mmäbøjcø'cä pønjaty mijts jaduñ wiing xyajnähiøøby ja'a Jesucristocøxpä. Cab hajxy jaduñ yajnähiøø'y neby højts ja'a Diosmädia'agy nyajnähiøø'yän ja'a Jesucristocøxpä. Cab hajxy jaduñ yajnähiøø'y ja'a Dioshespíritucøxpä neby højts nyajnähiøø'yän. Paquiä mijts ja'a miädia'agyhajxy jaduñ mbadu'ubøjcä. ⁵ Yø'ø

hána'c-hajxy jaduhñ wiing yajnáhixøøbiä ja'a Jesucristocøxpä, jaduhñ hajxy ñiñänømyii nebiä Dioswiinguexypän, neby jaanč tehñ jiajpän. Cab jaduhñ yhooyä coo hajxy mmáná'anät cooc tyijy hajxy miaas jaty queeč høøč njaty. ⁶ Wehñdáda'a jaduhñ tiøyyä cooč hoy yajxón nga'a xi'igy nga'a mädia'agy; cab jaduhñ ñejpiä. Pero tøyhajt jaduhñ cooč madiu'u njaty nnajuø'oy ja'a Diosmädia'agyquiøxpä. Homiänaajä højts mijts ja'a tøyhajt nmo'oy hoy ñä'ä tiiguiøxpä.

⁷ Mánáajøch mijts ja'a Diosmädia'agy nyajwiingapxø'oyän, cáboch mijts jaduhñ mänaa nnämaayy cooč mijts xmiäjúyät. Niguiudúunäböch hánajty hamdsoo, je'eguiøxpä coočä njoot hánajty chocy coo mijts ja'a Diosmädia'agy maas hoy mmäbøgät. Y cooč hánajty hamdsoo nniguiudúunäxä, páadyhøchä jäya'ayhajxy näje'e xñänømy cóogøch tyijy hánajty hoy nga'a cudiuñ. Pero cab jaduhñ tiøyyä. ⁸ Wiingjäya'ayhøchhajxy hánajty xpiuhbejp, ja'a Diosmädia'agy hajxy hánajty mäbøjpä wiingtuumjaty. Páadyhøch hajxy hánajty xpiuhbety cooč mijts ja'a Diosmädia'agy hánajty nyajwiingapx nyajwiinmädiaagø'oy. ⁹ Mánáajøch jimñ nhitiän maa mijtsän, cáboch hánajty pøn nnäma'ay cooč hajxy xpiuhbédat xädø'øñhaam, hóyhøch hánajty tii nja yajmaajiaty tähoocjaty. Hix, xpiuhbéjpøchä jäya'ayhajxy hánajty, ja'a Diosmädia'agy hajxy hánajty mäbøjpä, ja'a hajxy hánajty jimñ tsohmä Macedonia-naaxooty. Xmióobiøch hajxy hánajty tijátyhøch hánajty nyajmaajiajpy. Y cáboch mijts

mänaa nnäma'awa'añ cooçh mijts xpiuhbédat xädø'øñhaam. ¹⁰ Tømiädiáacpøch jaduñ nebiä Jesucristo tiømiädia'aguiän. Cábøçhä xädø'øñ pøñ nmäyujwa'añ jim maa mijts mdsäna'ayän Acaya-naaxooty. ¹¹ Coø pøñ jaduñ miänä'anät cóogøch tyijy mijts nga'a tsoçy, høhndaacp hajxy jaduñ. Ja'a Dios jaduñ najuøøby cooçh mijts njaanç tehñ chocy njaanç tehñ pia'häyoy.

¹²⁻¹³ Jii häna'c-hajxy näje'e wiädity mäwiinhøhmä. Ja'a Jesucristäc tyijy hajxy tøø wyiinguexyii coo ja'a Diosmädia'agy hajxy yajwá'xät maa ja'a mäbøjpädøjc-hajxiän, neby højts ja'a Jesucristo tøø xwyiinguexiän coo højts ja'a Diosmädia'agy nyajwá'xät. Pero høhndaacp hajxy; cab hajxy tøyhajt tøø wyiinguexyii ja'a Jesucristäm. Paady hajxy jaduñ yhøhnda'agy coo hajxy yajcumaya'añ. ¹⁴⁻¹⁵ Yø'ø häna'c-hajxy, ja'a møjcu'ugong hajxy wyiindsøñhajpy. Jaaya'ay hajxy jaduñ piahixyp. Nnajuøøyyäm hajxy coo ja'a møjcu'ugong ñibiäda'agyii nebiä jaanç tehñ yhojbän, nebiä Diosmoonsän. Hoorä, cab jaduñ yhoy-yagjuøøñä coo ja'a møjcu'ugongä mioonsähajxy piajatcø'øy, coo hajxy yhøhnda'agy cooc tyijy hajxy tøø wyiinguexyii ja'a Jesucristäm. Y coo hajxy jaduñ haxøøg jiäya'ayhaty, je'e hajxy jaduñ quiumädowaamby.

¹⁶ Hoorä, chámhøch mijts nmägápxcombä. Cab hajxy jaduñ mmänä'anät cóogøch tyijy tøø nguhhiñ, hóyhøch weeñtiä nja niguiumayii. Pero, pø mjaanç mänaamb hajxy jaduñ cóogøch tyijy tøø nguhhiñ, huuc tunä mayhajt hajxy, høøçhä nmädia'agy hajxy weeñtiä huuc hamädoowhíjtäc.

Nhuuc nimiädia'agyijøch weeñtiä. Nhuuc niguiumayijøch weeñtiä. ¹⁷ Cábøch nmäna'añ coočhä Dios ja'a cuhdujt tøø xmio'oy cooč jaduhñ nniguiumayøjät. Jadúhñhøch nniguiumayii nebiä cuhhiimbän. ¹⁸ Hix, ja'a jäya'ayhajxy nämaybä, miäniguiumáayyöp hajxy tijaty hajxy yaa miøød hädaa yaabä naaxwiin, møød tijaty hajxy jaduhñ tøø tiuñ. Jaduhñch høøchpä, wéeñtiøch chamñ nmäniguiumayáañäbä tijátyhøch tøø nduumbä. ¹⁹ Jaduhñ mijts mjaanç tehñ ñibiäda'agyii nebiä jaanç tehñ jiajpän nebiä jaanç tehñ ñajuøøbiän. Paady mijts ja'a cuhhiimbähäna'cä miädia'agyhajxy mhamädoowhidaañä. Pero cab hajxy tøyhajt mjaanç jaty mjaanç najuø'øy. ²⁰ Hix, mmee'xtujpy hajxy hoy ñä'ä tijatiä, hoy mijts yø'ø häna'c-hajxy hoy ñebiatä xjia häyoowhixy, yø'ø häna'c-hajxy høhñdaacpä, yø'ø miädia'agy hajxy mjaanç tehñ yhamädoowhidáañäbä. Xyhanehmb mijts jaduhñ nebiä moonsän. Y xñägáayyöp xñähúucäp mijts ja'a mxädø'øñ. Xwyiinhøhmb mijts yø'ø häna'c. Xpiejxp mijts yø'ø häna'c. Høxtä xquiojxp mijts yø'ø häna'c, y cab hajxy waamb mmäna'añ. Cab mijts yø'ø häna'c xyhixy nebiä jäya'ayän. ²¹ Pero højts, cab mijts jaduhñ mänaa nhäyoowhixy neby mijts yø'ø häna'c xyhäyoowhixiän, yø'ø häna'c-hajxy høhñdaacpä. Cab højts jaduhñ njootmøjjä.

Chámhøch weeñtiä nhuuc mädia'agáangumbä nebiä cuhhiimbän. Tijaty yø'ø häna'c-hajxy miäniguiumáayyöp, nmøødhøchä cuhdujt høøchpä cooč jaduhñ nmäniguiumáayyäbät.

²² Niguiumáayyäp hajxy je'eguiøxpä coo hajxy yhebreojäya'ayä, coo ja'a Abraham hajxy jecy yhaphajty tieedyhajty møødä Israel. Pues jaanä jaduhñch høøchpä, jaduhñch nniñänóømäbä coočhä Abraham tøø nhaphajpä tøø ndeedyhajpä.

²³ Jaduhñ hajxy ñiguiumáayyäbä je'eguiøxpä cooc tyijy hajxy mioonsähadyii ja'a Jesucristøm. Pues xmioonsähäjpøchä Jesucristo høøchpä. Y maas hóyhøch nduñ que yø'ø häna'c-hajxy tiuñ. Cooch jaduhñ weeñtiä nniguiumayii, jaduhñ yajmädoy nebiä cuhhiimbähajxy miädia'aguiän. Maas móc-høch tøø nduñ que yø'ø häna'c-hajxy tøø tiuñ. Mayhóoc-høch tøø nyajtsumy tøø nyajmach. Ni pøn jaduhñ quia'a yajtsumy quia'a yajmachñä nébiøch tøø nyajtsumiän. Mayhóoc-høchä häna'c tøø xjiaançh tehñ wiobho'ogy. Mayhóoc-høchä häna'c ja'a weenjaty tøø xquia'a yagho'ogy. ²⁴ Mägoøxc-hóoc-høchä judíoshajxy tøø xjiu'xy hii'xmajmocxmädaaxcø'ø.

²⁵ Tägoøghóoc-høchä häna'c tøø xwiopy paxyhaam. Tähooc-høchä häna'c xjia ca'ch; xquiuhga'adsáambøch hajxy hñajty. Tägoøghóoc-høchä barco tøø xmiäma'adø'øy mejjiooty. Xjia møødnøøguguiñhøch jaduhñ. Mänáajøchä barco tähooc xmiäguiñän, tu'xøøch jiiy nhijty mejywyiing møød tu'tsuhñ. ²⁶ Mayhóoc-høchä yoñdiu'u tøø ndu'uyo'oy. Mayhóoc-høch ja weenjaty tøø nga'a nøøho'ogø'øy mõjnøøgujç. Tøøchä mee'tspädøjc mayhooc nyohbiaady. Tøøchä nhamdsoo mägunaax mayhooc xjia yagho'oga'añ. Tøøchä wiinghäna'c xjia yagho'ogaambä; ca'a

yhøøchä nmägunaaxhajxy je'e. Tøøch nwädity mähahñdiuum jim cajptooty, møød jim pactuum, møød jim mejjiooty. Tøøchä häna'c mayhooc xchaaçhtiuñ, ja'a hajxy jaduhñ mänaambä cooc tyijy hajxy miäböcy. ²⁷ Tøøchä tuung mayhooc xyaghanuu'xø'øy; høxtä xyajtsaaçhpøjc-høch jaduhñ. Mayhøoc-høch tøø ndsunaxy jamia'ay jayhity. Tøøchä yuu mayhooc nmänaxy nyajnaxy møødä tødsø'ø. Tøøch mayhooc nhity jaguiay jayhu'ugy. Tøøchä tøøchpä mayhooc nmänaxy nyajnaxy. Nja yajmaajiápiøchä wit tucxy hänäjty.

²⁸ Tøøch madiu'u ndsaaçhpøcy, pero cáböch jaduhnajtä ngøxy mädia'aga'añ. Je'eçh nmädia'agaamby coöchä mäböjpädøjc jabom-jabom nnädajy nnämay wiinduhmçhajtøjc, pø hoy pø ween hajxy yhity. Hix, høøchä ngø'øjooty hajxy jaduhñ yhity. ²⁹ Pønä Diosmädia'agy hoy ca'a cudiunaamb, hoy hajxy jia mäböcy, nnäjootmayhájpjøch hajxy jaduhñ. Pøn jaduhñ cádiehby je'eguiøxpä coo tøø wyiinhøøñii, nmäjootma'adhájpjøchä häna'c ja'a tøø miäwiinhøøñäbä. ³⁰ Høøch, cáböch nyajcumaya'añ. Pero coöch häxøpy nyajcumaya'añ, je'eçh häxøpy nyajniguiumayaañäp coöchä häyohn mayhooc tøø nmänaxy tøø nyajnaxy. ³¹ Ja'a Diøshøch jaduhñ xñajuøøby coöch nga'a høhnda'agy. Ja'a Jesucristo ja'a Tieedy je'e. Tsøgä Dios hajxy cøjxta'axiøø wiingudsähgøøyyäm. Ja'a Jesucristo hajxy nWiindsønhtëm. ³² Mänaa ja'a Aretas hänäjty tiuñän gobiernä, mänitøchä mioonsä xjia yajmadsaañ jim maa ja'a cajpt jaduhñ xiøhatiän Damasco. Juhmuu'tswäditiä cajpt hänäjty

jaduhñ. Jia pädaac ja'a hadánaabiä hajxy majatiä tägø'øwøødiaact nébiøch jaduhñ nga'a pädsómät. ³³ Pero päyó'c-høch. Ja'a nmägu'ughajpøchhajxy hoy xquiuhdøñaxy cachjooty maa ja'a muuçh hánajty jiütän.

12

¹ Cab jaduhñ yhahixø'øy cooçh nyajcumáyät. Pero nébiøch cham nmädia'aga'añän, jaduhñ yajmadowa'añ nébiøch nyajcumaya'añän. Je'eçh cham nmädia'agaamby nebiátyhøçhä Jesucristo hijxtahñd tøø xyajwiinhixiän. ²⁻³ Nmøødhíjpiøçhä Jesucristo tu'ugmädia'agy. Tøø yhijnä majmactsjumøjt cooçhä Dios jim tøø xyaghoy tsajpootyp maa ja'a wyiinduumän. Cábøch nnajuø'øy pø ni'xhaam pø copc-háamhøch jim nuooy, o pø juøhñdyhaam. Ja'a Dios jaduhñ nidiuhm najuøøby. ⁴ Madiú'ujøçhä hoy-yagjuøøñäjatypä jim nmädooy tsajpootyp. Cábøçhä cuhdujt nmøødä cooçh nmädiaactägátsät. ⁵ Coo wiinghána'c häxøpy jim tøø yhoy tsajpootyp, mänítøch häxøpy nmøjpäda'aga'añ. Pero høøçh, cábøch hamdsoo nniguiumaya'añii. Jagóoyyøch nmädia'aga'añ nebiátyhøçhä häyohn tøø nmänaxy tøø nyajnaxy. ⁶ Nmøødhøçhä cuhdujt jaduhñ cooçh nmädiá'agät nebiátyhøçhä Dios tøø nmøødtuñ. Hix, tøyhájthøçhä Dios jaduhñ tøø nmøødtuñ. Cábøch nmädia'aga'añ cooçh jim nuooy tsajpootyp, je'eguiøxpä cooçhä njoot quia'a tsoy cooçh pøn xmiøjpädá'agät. Cooçhä jäya'ayhajxy xyhixät cooçh hoy njäya'ayhaty, cooçh hajxy xmiädówät cooçh hoy ngapxy nmädia'agy, mänítøch hajxy xquiiumáyät.

7 Jaančh tehṃ yhoy-yagjuøøñäjätyhøch jim nwiinhijxy tsajpootyp. Pero cabä Dios ja'a jioot chocy cooçh nniguiumayóøjät. Paadiä Dios miänaañ cooçhä mõjcu'ugong ja'a tsaachpä xyajpáadät, jadúhñhøch hamdsoo nga'a niguiumayóøjät. 8 Tägøøghóoc-høçhä Jesucristo nja mänuu'xtaacy cooçh cu xyajnáhwaach. 9 Mänítøch xyhadsooyy: “Njaančh tehṃ chojpy njaančh tehṃ pia'häyóobiøch miičh. Páadyhøch miičhä mdsaaçhpä nga'a yajnähwa'adsa'añ, nyajcähxø'øgáambiøch jaduhñ coo miičh mduñ ja'a høøçhä nmäjaagøxpä”, nõmhøçhä Jesucristo xñämaayy. Xoondáacpøch jaduhñ cooçhä ndsaaçhpä xquia'a yajnähwa'adsaannä, je'eguiøxpä cooçh tøø xñäma'ay cóogøch xyajtuna'añ ja'a miäjaagøxpä. 10 Xoondáacpøch jaduhñ cooçhä Jesucristo xyajtuñ, hóyhøçhä tsaachpä nja paady madiu'u. Náxyhøçhä häna'c xyhäyoowhixy. Náxyhøch cøxiä wiinä nyajmaajiaty. Náxyhøçhä häna'c xhaačhtiuñ ja'a Diosmädia'agyquiøxpä. Náxyhøçhä häyohn nmänaxy nyajnaxy. Pero cábøch nnä'ägä mõjpäda'agy cooçh jaduhñ njaty nhabety. Hix, cooçh jaduhñ njaty nhabety, cähxø'p jaduhñ cooçh tii nga'a tuñ ja'a nhamdsoo mäjaaháamhøch; ja'a Jesucristo miäjaaháamhøch jaduhñ nduñ.

11 Hoorä, hóyhøch tii nga'a ja jada'añ hamdsoo, nmaas jájpiøch høøçh quejee yø'ø häna'c-hajxy, yø'ø hajxy jaduhñ niñänóømäbä cooc tyijy hajxy Dyioswiinguexiä. Cábac tyijy pøn jaduhñ jiaty nébiäc hajxy jiatian. Y cooçh yø'ø häna'c-hajxy jaduhñ tøø xñähwaambety, tiičh mijts jaduhñ

coo tøø xquia'a nähgapxtu'udy. Cooch mijts tøø xquia'a nähgapxtu'udy, páadyhøch cham hamdsoo nniñähgapxtu'udyii. Jaduhñ weenjaty yajmädoy nebiä yajcumayaambän. ¹² Mänäajøch jim nhitiän maa mijtsän, mäníthøchä hijxtahnd madiu'u nyajcähxø'cy hoy-yagjuøøñäjatypä. Ja'a Diosmäjaaháamhøch jaduhñ nyajcähxø'cy. Nyajcähxø'c-høch jaduhñ coochä Dios jaduhñ tøyhajt tøø xwyiinguexy. Mee'xtújpøch hñajty. ¹³ Jaanç tehñ yhöyhøch nduñ hoy miädyyi tsajtøgootiä. Jaanä jadúhñhøch jim hoy nduumbä maa mijtsä mdsajtøjcän. Pero je'e mijts mga'a hojiäwøøby cooch mijtsä xädø'øñ tøø nga'a mäyujwa'añ nébiøch wiingtuumjaty nyujwa'añän. Jaanç tehñ wyiingä wiinmahñdy hajxy mmøødä. Pø tøøch mijts nyagjootma'ady, høøch hajxy huuc mee'xäc.

¹⁴ Metsc-hóoc-høch jim tøø nhooñä maa mijtsän. Miädägøøghóocpøch cham nnøcxáangumbä. Cábøch mijts tii nmäyujwa'ana'añ. Cábøchä njoot chocy coo hajxy tii xmió'owät. Jaduhñ mijts ndsocy nebiä hamdsoo huungpän, paady mijts jaduhñ nbuhbeda'añ. Pero cápøch nmäna'añ cooch mijts xpiuhbejtägátsät xädø'øñhaam. ¹⁵ Tøøchä njoot hamuumdu'joot nbäda'agy maa mijtsän coo mijts nbuhbédät hoy ñejpiä, hóyhøch cøxypänejpiä cu nja jat cu nja habet maa mijtscøxpän. Njaanç tehñ chojpy mijts jaduhñ; pätiidä mijts jaduhñ coo xquia'a tsojtägach.

¹⁶ Mänäajøch jim nhoyyän maa mijtsän, cab mijtsä xädø'øñ nmäyujwaañ. Mnajuøøby hajxy jaduhñ, tuhmds. Pero näje'e mijts jaduhñ mmäna'añ cóogøch tyijy mijts tøø nwiinhøøñ

17 mänáajøchá nmägu'ughajpähajxy jim̄ nguexiän maa mijtsän xädø'øñyajmujpä. Jadúhñägäts tyijy mijts tøø nmämeech. Pero cab jaduñ tiøyyä.

18 Mänáajøchá hermano Titohajxy jim̄ nguexiän maa mijtsän møødä mägu'ughajpä tu'ugpä, ni je'e mijts xquia'a mämee'tspä. Hix̄, jaduñä hermano Tito howyiinmahñdy hajxy miøødäbä nébiøch nmøødän. Hoguiuhdujt hajxy miøødäbä nébiøch nmøødän.

19 Jaduñ mijtsäda'a mmäna'añhaty cooc tyijy højts nja wi'i ñiñähgapxtu'uda'añii maa mijtsçøxpän. Pero cab jaduñ tiøyyä. Ja'a Dios højts xyhixp coo højts ja'a Jesucristo tu'ugmädia'agy nmøødhity. Mägu'ughajpädøjc, paady højts mijts ja'a Diosmädia'agy jaduñ nyajwiingapxø'øy, chojpy højtsä njoot jaduñ coo mijts hamuumdu'joot mjaac mábøgät. 20 Cooch jim̄ nnøcxtägätsät maa mijtsän, mänitøch jootcujc nhidät pø hoy hajxy hñajty mwädity. Jaduñ hajxy jootcujc mhíjpät ja'a høøchcøxpä. Pero pø cab hajxy hñajty hoy mwädity, jootmayhádäbøch jaduñ. Jaanä jaduñ mijts mjootmayhájpät. Je'eçh jaduñ cham̄ nnädaj nnämaaby. Je'eçh jaduñ nnänøømby ja'a ca'a howiädit, pø mnimiädsibøøyyäp hajxy hñajty, pø cab hajxy hñajty myajniyajmädsogyii, pø mnimiäjootmä'täp hajxy hñajty, pø mnimiädsiphájtäp hajxy hñajty, pø mniwyiingapxpéjtäp hajxy hñajty, pø mniñänøømäp hajxy hñajty cøxypä waamb, pø mniguiumáayyäp hajxy hñajty, pø mdsipyagjájäp hajxy hñajty. 21 Pø jaduñ hajxy hñajty mjaançh jootcø'øy cooch jim̄ nnøcxtägätsät maa mijtsän, wéhñdøchá Dios weenjaty

xyajtsähdiúnät maa mijtscøxpän. Je'ečh cham nnädaj nnämaaby. Nnäjootmayhádábøch hajxy je'e, pønjataiä yhäxøøgcuhdujt hajxy hänäjty tøø quia'a najtshixø'øy. Je'ečh jaduñ nnänøømby coo wiingto'oxiøjc hajxy piawädity tehngajnä.

13

¹ Miädägøøghóocpøch jim nnøcxa'añ maa mijtsän. Jaduhnä cuhdujt myiñ, coo hajxy hänäjty pøn mnäxø'øwø'øwa'añ, tsipcøxpä testigo hajxy myajcähxø'øgät mejtstägøøg. ² Mänäajøch jim nhuug hoobiän maa mijtsän ja'a miämetsc-hoocpä, mänitøch hajxy nyajcuhojøøyy coo hajxy häxøøg quia'a jootcøñät, pønjatai hänäjty häxøøgwädijp. Y chámhøch mijts jadähooc nnäma'awáangumbä nägøxiä coo hajxy mga'a häxøøgwädität. Y pø je'enä hajxy hänäjty mhaxøøgwädity cooch jim nnøcxtägátsät maa mijtsän, tsipcøxpøch mijts nøcxy nyajcumädowa'añ. ³ Jadúñhøch nyajcähxø'øga'añ coochä Jesucristo miädia'agy tøyhajt nyajnaxjä. Haa ca'a, jadúñhøch mijts tøø xyhuuc nämaabiä cooch jaduñ nyajcähxø'øgät. Hix, møcmäjaahaamä Jesucristo hajxy xyajcumädówät coo hajxy hoy mga'a wädität. ⁴ Coo ja'a Jesucristo miøjpahbejtä cruzcøxp, cabä miøcmäjaa hänäjty yajcähxø'øgy. Pero coo jiuypjøjtägajch, coo jim ñøcxtägajch maa ja'a Tieediän, jimäts jaduñ yhiñä ja'a Tieediä miøcmäjaahaam. Nebiä Jesucristo ja'a miøcmäjaa hijty quia'a yajcähxø'øguiän, jaduñ højts mäjaa nga'a møødäbä hamdsoo. Pero coo højtsä Jesucristo nmøødhity tu'ugmädia'agy,

paady hõjts mijts hoy nhane'ema'añ ja'a Dios ja'a miõcmäjaahaam.

⁵ Huuc niñajuø'øwøø hajxy hamdsoo. Coø ja'a Jesucristo ja'a miädia'agy hajxy hoy mbanõcxät, jaduñ hajxy myajnujuø'øwät coø ja'a Jesucristo hajxy tøyhajt mjaanç møødhity tu'ugmädia'agy. Pero coø hajxy hoy mga'a panõcxät, cabä Jesucristo hajxy tøyhajt mmøødhidät tu'ugmädia'agy. ⁶ Choippy hõjtsä njoot coø hajxy mnajuø'øwät coø hõjtsä Jesucristo tøyhajt nmøødhity tu'ugmädia'agy. Cab hõjts jaduñ nhõhnda'agy. ⁷ Nmänuu'xtaacypy hõjtsä Dios coø hajxy hoy mwädität, coø hajxy haxøøg mga'a jäya'ayhädät. Pø mwädijp hajxy hänajty hoy coø hõjts jim nnõcxtägätsät maa mijtsän, cab hõjts hänajty nyajcähxø'øga'añ coø hõjtsä Jesucristo ja'a cuhdujt tøø xmio'oy coø hõjts mijts nyajcumädöwät. Y coø hõjts jaduñ nga'a yajcähxø'øgät coø hõjtsä Jesucristo ja'a cuhdujt jaduñ tøø xmio'oy, cab jaduñ ñejpiä. Je'e hõjtsä njoot choippy coø hajxy hoy mwädität. ⁸ Pø mjaanç wädijp hajxy hänajty hoy coø hõjts jim nnõcxät, cab hõjts mijts hänajty waamb nnäma'awa'añ. Choippy hõjtsä njoot coø hajxy tøyhajt hoy mwädität. Pero pø cab hajxy hänajty tøyhajt hoy mwädity, mänit hõjts mijts mäböcy nhoja'añ. ⁹ Coø hajxy hoy mwädität, xonädá'agäp hõjts jaduñ. Cab hõjts jaduñ nyajcähxø'øgät coø hõjtsä Jesucristo ja'a cuhdujt hänajty tøø xmio'oy coø hõjts mijts jaduñ nyajcumädöwät. Nmänuu'xtaacypy hõjtsä Dios jaduñ coø ja'a mhaxøøgcuhdujt hajxy mgøxy najtshixø'øwät,

coo ja'a hoguiuhdujt hajxy hamuumdu'joot mjaac panócxät tehngajnä. ¹⁰ Páadyhøch mijts cham weenjaty nhojy nocyhaam, jadúhnhøchá njoot chocy coo hajxy hoy mwädítät. Ja'a Jesucristøchá cuhdujt jaduhn tøø xmio'oy maa mijtsøxpän, weenä miädia'agy hajxy maas hoy mjaac mæbøjcä. Cabä Jesucristo jioot chocy coo hajxy mdu'udägóyyät. Y pø mjaançh wädijp hajxy hånajty hoy cooçh jim nnøcxtägátsät maa mijtsän, cábøch mijts hånajty waamb nnäma'awa'añ. Pø caj, mänit højts mijts mæbøcy nyajcumädówät.

¹¹ Hoorä, mägu'ughajpädøjc, chámhøch jaduhn nyajmayaannä maa hajxy cham nmägapxy nhane'emiän. Huuc cudiún hajxy jaduhn nébiøch cham nnäma'ayän. Yaghoyø'øw ja'a mdu'u hajxy. Ca'a haxøøgtu'u hajxy mbanøcxnä. Tsøc hajxy jaduhn nimiøødhíjtäm tu'ugmädia'agy. Cab hajxy tii myajtsip myajma'adóøñät. Jaduhnä Dios hajxy xmiøødhíjnät. Xchójcäm ja'a Dios hajxy. Choppiä jioot jaduhn coo hajxy jootcujc nhíjtämät. ¹² Mniyajpoo'xøøjäp hajxy hamuumdu'joot, ween jaduhn quiähxø'øgy coo ja'a Diosmädia'agy hajxy mmæbøcy. ¹³ Xyajpoo'xp mijtsä hermanodøjc-hajxy yaabä, ja'a Diosmädia'agy hajxy yaa mæbøjpä.

¹⁴ Weenä Jesucristo hajxy nägøxiä xmio'oy ja'a hoyhajt ja'a weenhajt. Je'e hajxy nWiindsønhájtäm. Weenä Dios hajxy xchójcäm homiänaajä. Weenä Dioshespíritu hajxy xmiøødhíjtäm nägøxiä. Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

4e564219-157f-5807-b810-47a15308b8b8